

宋學士全集

二



省立圖書館
中文書



宋學士全集
(一十)

17.8
1
1.2/20

宋 濂 撰

宋學士全集卷之十九

墓誌銘

贈承事郎吏部侍郎張府君墓誌銘

國朝之制凡官階自七品至於第四皆贈封其父母與妻。上德至渥也。於時吏部侍郎張度官品居四。從例贈其父府君吏部侍郎。母林氏德人。命書旣下。度錄其副楮。焚祭墓下。復請一介蟻蝨之臣。待罪銓曹。恩榮溥博。逮及二親。鸞綾金軸。下賁泉壤。度深懼無以侈上賜。而垂示來裔。莫墜匪石。願吾子爲文之。濂謹按狀。府君諱復禮。字禮庭。姓張氏。廣之番禺人。番禺有鄉曰黃岐角。皆張姓。環居之。室廬櫛比。當秋宵月白。燈火連接。而讀書之聲相聞。宋紹興間。有諱堦者。始遷於禮園社。堦生飛一。通周易。能會粹諸家之說。而折衷之。廣之士大夫。推爲宗師。號曰黃岐張氏易。歿葬世之南山。配麥氏。生二子。彬甫。鄰甫。皆善傳父經。旣葬。父晝夜念之弗置。構堂曰永思。兄弟躬耕。以奉歲時祀事。彬甫娶羅氏。生丈夫子三。其次卽府君也。府君薰炙家庭之教。而於易學尤精。發爲大義。頃刻千餘言。出入朱程二氏。無乖謬者。漢儒拘泥不通。或流於術數。痛麾斥之。當是時。科目方盛行。鄉人士咸謂府君爵祿。可以引手致。府君笑曰。學易者爲知吉凶悔吝而已。何以官爲。獨念居處村疇。諸子見聞孤陋。乃築室都城中。俾就名師儒游。見其成立。輒喜動顏色。已而度舉茂才。去而爲肇慶路高要縣學教諭。迎養甫六齡。而府君歿矣。時至正二十一年辛

丑四月二十三日也。享年六十有一。國朝洪武元年戊申十月十五日。度奉柩葬於增城縣西之章山。因遷家焉。四年辛亥。度受薦入朝。拜監察御史。以至今官。風采凜然。貪墨爲之屏迹。君子賢之。府君四子。長卽度。次輔。次峻。次熙。輔。峻。俱早世。孫男二。曰原潔。曰吉祥。女五人。昔人有云。爲善者譬猶藝禾。世世能令嘉種不絕。則其發育也益昌且碩矣。信哉斯言也。府君世爲儒。積善之聞播於海南。實合於易積善成名之義。今度位居法從。其聲益大以宏。是皆府君遺休垂祉之所致。度方欲爲親榮。而府君不及見矣。悲夫。此墓門有碑。其銘固不可不勒也。銘曰。

一屈一伸。其理孔神。易道之門。君子之攸遵。宜文而彰。乃韜其光。不露而揚。俾後胤之昌。有命自天。寵臨昭宣。鬱蔥而綿延。是爲張氏之阡。

元故文林郎同知重慶路瀘州事羅君墓誌銘有序

嗚呼。士君子立志。孰不欲建功名垂竹帛哉。或不能逢其時。時逢矣。或剛正忤物。坎壈至死。卒無以達其志。志弗達矣。使其名復寂寂無聞。其鬼不靈則已。脫稍有知。未必不鬱悒於九泉之下。操觚任紀載之責者。寧不爲一動心耶。此余於廬陵羅君。殊惻然也。嗚呼。君諱文節。字仲正。姓羅氏。羅爲江西右族。唐肅宗時。自洪都遷廬陵之秀川。入宋以來。家談仁義。而人悅書詩。以通經。上南宮對大廷者。幾無虛歲。朱紫相承。照耀州里。起綰郡章者四人。而邑之令佐尤夥焉。曾祖時誠。祖宗權。鄉貢進士。父履泰。字以通。爲元之鉅儒。著書滿家。春秋禮記周禮三經皆爲之集解。復衍河洛圖書之義。列圖三十。多前修所未發出。其餘

力補正戰國策舛誤數百條。且爲年表。以次其先後。行丞相府。聞其名。署東湖書院山長。蓋世號道齋先生者也。君始能言。其父抱就書室。抽一卷授之。祝其疾讀。君指插架牙籤曰。吾齒稍長。雖盡通之。未嫌也。其父驚喜。暨肄小學。輒以氣雄諸生。莫敢與其齒。後從宦東湖。賢士大夫咸折輩行爲忘年交。問學日進。水湧而山出。撫州判官燕君某。辟爲郡吏。郡有獄疑不決。守貳爭以爲問。君歷階而升。摘其案語曰。如此則爲直。如此則爲枉。儕類大慙。出奇計沮君。會朝廷有詔。造鹵簿器仗。遣君至屬縣督其成。君至樂安。憩縣廡中。羣吏更謁互諫。以爲鬼物所馮。不宜居。君笑曰。惡有是。乃酣飲而寢。夜漏下十刻。月色微明。見丈夫長而青。立與檐齊。君奮起執之曰。爾來矣。爾來矣。應時而滅。黎明視之。並廡有豫章。穹隆而敷腴。縣人祀以爲神。君曰。其怪在爾矣。歷數其罪。用竹楔釘之。未幾。豫章枯死。怪遂息。郡有織錦工。嘗籍於官。竟遁入武昌。出入辨章溫公門。溫勢燄薰灼。莫敢誰何。復嗾君捕之。縣知之不敢受。君牒君直訴辨章。辨章曰。爾胡不求之府公乎。君如言而往。府公搖手相戒。亦不復出一語。君怒。洊走辨章門。辨章厲色斥之曰。業已囑爾矣。復來何耶。君曰。工合應官。繇府若縣。謂其爲社鼠城狐。不能詰區區小人。固不知何所指。明公乃方嶽大臣。不助半指之力。如廢王法何。辨章語塞。卽下令捕與之。衆益譁曰。是尙不畏溫辨章。其有我輩乎。謀出之益急。君懼禍及。裹糧馳燕都。燕都貴人亦忌君峭直。高門縣簿。無可投足者。遂入成均爲弟子員。一日方挾冊諷詠。有相者謂君曰。君兩頰入鬢。當邊微建功。無以久淹爲也。君遂用國子助教姚公登孫之薦。上於集賢。集賢移文雲南。行中書。署君昆明州學正。秩滿。陞授孟傑府。君列蠻夷子弟。曉之以

君臣父子之義。辭氣激烈。聽者聳然。轉普定府知事。廉行彌厲。大理金齒宣慰司辟爲令史。豪酋侵人疆。賦持黃金數鎰爲君壽。乞君勿右愬者。君麾之去。酋怒曰。君賽天赤邪。乃不納吾金也。賽天赤。鎮雲南之名相云。君卒奪田歸愬者。乾崖瀨里當賦金。使者至。蠻人納賂。往往過所賦之數。而金又不可免。君至。憫其愚。反覆開導之。蠻人鼓舞於庭曰。微使者之廉。孰能恤我至是。亟輸金而還。俄入掾雲南。行中書。雲南驛騎。皆官中給直。官吏乾沒之。以市馬賣土酋。君曰。爲天子牧元元者。顧若是邪。痛懲其弊。朝廷以雲南在萬里外。下吏部準循舊比。行銓選之法。使者至。選君承其事。君知積弊未去。且曰。王者無外。敢不靈承上命。以正其法乎。獻五策於使者。吏受民賄者。官不稱職者。廩藏不會者。月日不登者。居制未終者。皆不調。使者大悅。悉從之。倖門遂塞。滇池有神蛇。能興雲雨。會大旱。民屢走池上。若無聞者。君爲檄責之。片雲歛然。輿雨因霑足。南詔海中積葑成淤。而浮游水上。夷獠耕稼之。號曰葑田。田如不繫舟。西東無定。人交相爲盜。君命紀字爲號。疏其步晦。及四畔所屆。上於官。官爲給券。使有所馮。復植木於海岸。嚴其畛域。不相淆亂。或海潮漂蕩。有藉以爲奸者。俾出券環證之。竟歸其田。夷獠指示子姓曰。此羅掾所賜也。否則人盜之久矣。監察御史至。每召君於庭。事難定者。必待君言而後決。雲南王亦熟君行。命陞爲提控掾史。提控堂六房之政。人多畏縮不前。君益淬礪弗少怠。適中朝大臣喜意以失宰相意。出參省事。銳意更張。庶事悉心任君。君知無不言。言無不聽。名聲翕然動蠻夷中。先是蠻夷有鐵甲郎者。負固不服。至是驩曰。天子遣賢輔臣至矣。奈何不降。帥未附者皆來歸。君之功爲多。鎮戍萬夫。長伯胡行事多不法。憲府繩之急。

伯胡擁兵以叛。累歲不能討。曲靖宣慰使鬼宗亦蠻酋也。助兵一萬夾攻之。伯胡就縛。幕府上功。擢鬼宗參知政事。將上省臣。上下莫不與之。君力爭曰。雲南親王臨蒞之地。辨章而下多八座。大臣何得有蠻酋位邪。苟錄其功。便以參政之名。自鎮其土。足矣。不然。國體其謂何。空一府咸曰。微羅掾幾失之矣。鬼宗懼。託君鄉人囊金以獻。君怒曰。腕可斷。案不可署。鬼宗恚而止。君疾惡如仇讎。聞部使者德住貪暴。賦虎神詩以爲風德住銜之。賄西行臺御史。以專權自恣。劾君。君走憩中臺。遂擊德住去之。夷人大快。君以常調除承事郎。同知彌勒州事。政成。謁選吏部。遇鄉友羅玉於逆旅。乃勸君曰。君以剛毅取嫉於人。致齟齬一世。秋髮已續。紛被肩。何不謝事以佚老乎。君慨然曰。子言誠是也。乃上乞骸骨之請。以文林郎同知重慶府瀘州事致仕。年僅六十三耳。居數年。中原道澀。乃犯鯨波之險。由海道至閩中。而江西兵饑方亟。遂不可還。以至正二十六年十二月壬戌。終於福州之民舍。君未終。謂其友曰。此正吾死所也。夫何憾。時閩猶奉元正朔。云其壽八十。洪武五年冬。君之喪始還。明年某月日。始祔葬先兆龜山之原。君長身而瘠。胸襟磊落如青天白日。喜面折人過。雖王公貴人無所避。故有過者常畏君知。亦有幸其知以自改者。民事有屈而不伸。君廉得其實。忿見乎色。必以告司法吏。因得白者甚衆。知識尤絕人。每言某地當有兵變。時承平人競指笑之。其後果然。始服其先見。生平急患難。重倫義。族叔繼賢久居燕。頗饒於貲。與妻柳皆老而無胤嗣。乃迎羣從子觀遠爲後。觀遠至甫七日。而繼賢夫婦死。其服役者羅參出而呼曰。我嘗爲子矣。觀遠何人。乃欲與吾事邪。觀遠弱喑不能對。君亟告公府。逐參。盡囊括其貲。授觀遠。且具舟車。使扶二喪。

遠江南不特此也。凡遭疾疢貧窶及死喪無依流離不能歸者。君必捐金倡義士周之。初不知其爲何如人也。君娶劉氏。子男二人。長大紀。有文學而剛介。酷肖君。次次炳。贈番禺縣主簿。初次炳爲奏差廣東宣慰府。宣慰使釋迦班。嘗招峒丁三千。卽遣征連州。峒丁怒。至清遠將爲變。衆憚弗敢往。次炳請前峒丁彎弓相向。次炳紿之曰。宣慰命我來賞汝。彎弓何爲也。峒丁退。與清遠令斂緡帛散之。乃率以往。至連。爲寇所敗。次炳被擒。備極慘酷。竟不屈而死。致有今贈女二人。長適郭滋蘭。先卒。次復爲其繼室。孫男一人。儼曾孫男一人。某君葬後二年。大紀汲汲圖君於不朽。以國史編修趙君璠所爲狀請譔墓門之銘。嗚呼。予昔總修元史。每求剛正之士。在下位而不伸者載焉。蓋以謂雖不能拔之於當時。聊使其暴白於後世。庶幾死者無憾。而生者不媿。惜乎有司不上君之事也。於是徇大紀之請。執筆而具書之。百世之下。必有因予文而知君者。雖然。予何人哉。文之傳不傳。固不可必也。所可恃者。世人豔君之行頗多。多必則倣之。則倣之。必相與謹視之。文其有不傳者乎。信有人如君。終至湮沒無聞。則夫天理人心。儼如出日者。果爲何說也。嗚呼。銘曰。

堪輿之間。正氣烈烈。在人爲剛。在物爲鐵。鐵尙可鎔。剛則弗屈。挺然常伸。欲不可涅。一惟君之生。能以志雄。遵養以時。日擴以充。百壬所忌。吾惟正從。譬彼川流。萬折必東。二古惟正人。妖不敢干。凡其豫章。變爲枯管。誰鎮大藩。乃復蔽奸。我往折之。聞者膽寒。三夷人何知。椎結卉服。宣厥彝經。丕變其俗。爾金我辭。我直爾曲。凡施惠利。惟日不足。四威靈旣震。叛民來歸。鐵甲旣旻。棄戈而嬉。有聲泚泚。有澤輝輝。有知卽爲。

不識位卑。其五繡衣孔揚。其貪若狼。我斧我斨。莫不加其亢。形之聲歌。庶懲而獲。覆謂我狂。嘗我以涼。其六持此而行。何適不艱。坎壞其躬。恬夷其顏。胡不爾庸。以豕爲冠。鷹隼一出。狐鼠盡除。其七實否易位。曷以爲政。君亦何傷。人爲嗟咏。禾黍離矣。涼颺棘矣。吉士亡矣。何嗟及矣。其八

故處州路慶元縣儒學教諭張公墓誌銘

濂當弱齡。嘗游學郡城中。時王教授雲卿方之官嚴陵。忽持餞行卷示濂。中有浦陽張公詩。音律清麗。而字體莊勁。得八分之正。心竊慕之。後七年。始獲拜公於月泉里第。公風神峻潔。眉目聳秀。遠而望之。若玉井冰壺。絕無一毫塵土意。及聆其論議。則繙然如貫珠。退因私念。前輩沈涵深固。故其見於辭氣者。有不及。未嘗不自嘆鄙吝粗穢。而莫克攻勵之也。方將爲問道攷德之圖。居無何。而公亡矣。又後十年。公之子端臣。件繫羣行爲狀。來金華山居。請濂爲之銘。濂誠後死。不可謂不知公者。銘何敢辭。公諱恕。字如心。姓張氏。爲婺之浦江人。曾祖貴。宋宣義郎。祖祚。承信郎。父森。湖南潭州路教諭。公幼而穎悟。取家中遺書。晝夜研摩之。雖暑燦金。寒折膠。不易其恆度。迨長。聲名藉藉起士林。間遠近來學者。戶外之屨常滿。已而用薦者。教授常德之武陵。遷婺之東陽。處之慶元。公所至。皆以興學爲己任。招集弟子員。危坐堂上。列羣聖人之書。爲之敷釋大義。皆充然有得。士風爲之不變。尋以母夫人春秋高。歎曰。孝者。百行之冠冕。吾母鶴髮垂頰。尙可宦游而弗之止邪。自是夷猶里閭。日侍夫人之側。當風日清美。或杖藜行佳山水間。如嗜飲食。或勝友時集。輒商略古今上下數千年事。及燕沈淪茗。賦詩自娛。有不知老之將至也。公素患脾疾。

至是發寢劇。遺命治喪勿用浮屠氏法。當依朱子家禮從事。遂瞑。公生於咸淳辛未十一月乙亥。卒於至正癸未六月乙卯。壽七十三。娶方氏。有婦德。克配君子。生子男六人。虎臣。端臣。鼎臣。稷臣。純臣。敬臣。子女二。子貞。方元亨其壻也。孫男五人。僧家奴。道童。留孫。復生。憶祖。僧家奴。復生早卒。孫女三人。其年十月己亥。窆公於縣東五里原先塋之側。其所著書。有詩集若干卷。藏於家云。夫自師道不立。後生小子。失其所依憑。無以承藉其所休祉。而甄陶其性情。故蒞事制物。動與理違。深爲識者之所慨嘆。有如公者。惓惓以斯道淑諸人。所以爲世防而昭民能者。實於是乎賴。而公竟死矣。雖然。公之子皆業儒。端臣博學而能文。辭尤號最良者。是橫經邑庠中。俊秀子弟皆環聽之。公雖亡。其不沒矣。夫銘曰。

孰武其先。公則式之。孰膈其後。公則迪之。累世之儒。聲華燁而況公之施。三爲校師。衿珮透佗。左矩右規。鑽石幽墟。以昭以貽。里中子宋濂謹譔。

嘉議大夫泉州路總管朱公墓誌銘

濂少時。卽見莆士朱公廷試文數篇。已歎其不可及。後二十年。聞公官閩中。所歷有聲。尤慕服之。及今又閱二十餘年。公之孫瀟以墓銘爲屬。問公之死。已十七年。而濂亦老矣。嗚呼。其何忍辭。公諱文憲。字原道。姓朱氏。九歲能文。十三從進士林。君岡孫學經。每日暮須諸生出。獨援疑義難其師。其師驚歎之。元至治癸亥。以尙書舉進士。丁外艱去。至順壬申再舉。遂上名南宮。對大廷。名列第十。賜進士出身。擢同知瑞安州事。階承事郎。改汀州路總管府推官。轉承務郎。調甌寧縣尹。進奉訓大夫。御史交薦於朝。除福建宣慰

司都事丁內艱。起知瑞安。以大臣奏授奉議大夫。福建儒學提舉。遷同知泉州路總管府事。陸奉議爲奉政。至官。引年辭歸。遂以嘉議大夫泉州路總管致仕。命未下。以至正癸卯八月九日卒於家。年六十九。公同知瑞安。大府檄公均瑞安平陽永嘉之役。不爲權沮財奪。民服其平。爲甌寧行均役法。上官以其舍人爲屬。請緩之。公格不奉命。上官怒。誣構公罪。部使者廉其非辜。獲免。且以訟牒三百委公治之。公從容剖答。而退不能。有言其知瑞安盜起旁境。陷陶山天門諸堡。募壯士攻破之。斬其酋以徇。颶風挾海水。漂民廬舍。公發官廩。按行漂所賑之。其提舉學事。逐其苟職者。易以儒。儒悅之。公孝友切至。以父不迨祿。養言輒涕泣。事母唯恐拂其意。撫五弟教而有恩。居官無廢事。公暇講授不輟。學者因所居稱葵山先生。嘗考閩浙江西三省士。所取得美材。爲文本於理。不爲浮辭曲辨。陳監丞旅稱之。有集若干卷。藏於家。公之先建安人。曾祖德誠。宋潭州駐泊。祖治安。元河南等處醫學提舉。父世英。始遷莆。以公貴。贈奉議大夫。同知興化路事。驍騎尉。追封仙游縣子。母林氏。贈仙游縣君。夫人池氏。封如其姑。年若干。以丁酉某月日卒於瑞安。是年十二月十六日。歸葬常泰里雙牌山之原。及公卒。穿夫人之墓合葬焉。甲辰七月二十一日也。男一人。鏞。古田丞。六女。適校官林敏中。漳州路同知王謹。惠安尉胡顯祖。及黃孔修。李某。王某。孫男一人。卽瀟。國朝鄉貢進士。能世其家。銘曰。

在元中世。士患無位。持經挾策。就有司試。試者爲誰。或哲或愚。或以微類。棄照乘珠。及其旣獲。爾州爾邑。有所不通。爲吏侮執。有美朱公。游薦而登。左律右經。吏駭且偵。剔蠹平徭。如衡稱物。有撓之者。正色不屈。

既典方州。亦司儒臺。黜士之賈。誅盜之魁。曷其致然。維學知要。學以爲政。天下猶小。彼何弗思。營儒爲迂。刀筆拘拘。視公何如。公政在民。無銘亦存。銘匪銘公。告其後昆。維爾後昆。於公是效。公德孔多。尙食其報。

故岐寧衛經歷熊府君墓銘

熊君伯穎卒。其友之仕者爲之請銘。余曰。君與余善。且才而文。銘余所宜爲。後數年。余致政歸。衰老多病。未暇具其事。而爲之請銘者亦亡。余曰。噫。余可負吾友耶。乃按故所書爲銘。君諱鼎。字伯穎。姓熊氏。撫之臨川人。世以尙書教授於鄉。君少有敏質。年十八。從父受經義。通之。每私較試。輒冠其鄉人。鄉人推讓不敢與齒。後六年。爲元至正七年。領江西第九名薦書。上燕京。就禮部試。文彩燁然。動人。偕試者竊視。執筆不敢下。衆咸以高第期君。有司以君議論奇。竟棄不取。君絕不爲意。曰。第不第。命也。命可尤耶。束書南歸。當時名人若張文穆公起巖。余忠宣公闕。李諭德好文。張承旨竊。危左丞素。揭祕書沚。黃助教啤。皆重惜其去。相率爲文辭以餞。君退而益修其業。十一年。江西行中書省檄爲吉安路龍溪書院山長。龍谿故有田。屬他邑。前山長久不理。浸侵之。君至。問吏叱曰。國家置田以養士。田亡。士將安食。卽檄所治徵索。旣具。弟子員肄業如令。月旦望玄端深衣。據席講說。程其良否。而獎督之。無賴徒陳小峯。縱其子寧爲直學。握出內之柄。每與山長抗禮。君按法黜之。小峯噤不能吐氣。以死。郡守妻喪。遇兵亂。其子撤山長座。將遷柩。明倫堂上。柩至門。君叱止。鼻者寘諸別室。復欲以浮屠祝屍。浮屠方以鈴鉢至。君怒。撞壞之。曰。此吾孔子堂。豈浮屠廬耶。亟屏去。勿汚我。守聞嘉嘆君。而以書謝曰。先生教我厚甚。時江西寇漸起。所在擾潰。不可

爲職諸郡帥守知君練籌略。往往延問軍政。君亦以拯民自任。悉心力爲之計。贛郡帥全普庵撤里尤器君。命君擇險隘爲守禦備。君於皇恐大藜諸灘。設坑穿。建砦柵。構屋三千餘間。結民兵自守。由是贛獨完於他郡。戍將三人。坐戰敗。將加誅。君爲救解出之。會當大比。他郡多以兵廢。君獨請全舉行。觀者以爲異事。吉安歲凶。全與吉安守有隙。禁吉民勿入贛。民啼號於道。君爭曰。盜之起者。爲饑寒所迫耳。今使君閉糴。將開盜門。脫吉民事。亟生變。贛能獨全乎。全悟。卽罷前令。君周旋兵間。委曲爲民。皆此類。十三年。郡多君前績。便宜擢君贛縣尹。員外置。君恥之。辭不受。未幾。以父喪歸。服除。兵部尙書黃昭。江西廉訪使吳當。總兵出閩關。辟君參謀軍事。君爲昭畫策甚詳。會昭與當罷兵柄。策不行。二十一年。陳友諒僭號於九江。用黃昭解觀等薦。以君爲太常卿。俾守令踵門起。君堅臥不赴。旣而國朝兵入江西武順。寧河王鄧愈聞君賢。下令徧索。君強起。揖王軍門。王與君論事合。大喜。致帳中。日夜咨以事。一軍驚驩。以爲主將得師。君見王寬裕。誠大將材。遂委身從之。不去。贊王取撫州。兵不血刃。賊酋鄧克明夜遁。二十二年。皇上親將兵入豫章。州郡望風款附。九江亦下。君得詔見。慰勞甚至。二十三年。丁母夫人憂。後三年。以大臣薦。徵至南京。奉旨偕諸儒。撫古昔嘉言善行。作公子書。以訓貴戚子弟。書成。賜襲衣白金。會初平浙西。授湖州府德清縣丞。君招輯綏懷。除別宿蠹。創三皇孔子廟。建官吏麻署。到官數月。事治政平。餞鶴臯反。嘉興聲搖。德清民皆逃散。君堅坐鎮之。錢不敢入。吳元年。上將正位宸極。召議禮儀。除中書考功博士。尋遷起居注。承詔搜括故事。可懲勸者。書新宮廂壁。時上精求禮樂之事。嘗召翰林學士朱升等陳樂器於庭。上擊磬。命

升辯五音。升對忤旨。上大怒。欲寘諸法。君從容論解之。上曰。升每謂審音。顧不辯宮徵。何耶。君對曰。石音難辯。自古而然。唐虞惟后夔能和磬聲。書曰。於予擊石拊石。百獸率舞。上曰。任此豎儒治樂。樂何繇和。君具言樂之和。由人所致。人君能致中和。則萬民和。萬物和。而樂音和矣。上怒乃解。釋升不問。升既出。謝曰。非熊君吾屬幾殆。舍人耿忠奉使回。奏廣信郡縣官多違法。前所陳茶稅失實。時新行赦。上怒。趣中書遣御史往廉狀。丞相李韓公善長諫不聽。御史已受詔。丞相復諫不從。君與給事中尹正諫曰。朝廷新立。將布大信於四方。今肆赦之後。復以細故而煩御史按問。既失信。且喪國威。上良久乃曰。止。其追御史毋往。上詔浙西民輸糧京師。浙西小不可。浙江率五石致一石。民甚苦之。君叩頭曰。國家都金陵。以浙西爲根本。而遽困之。農作方興。而僕僕於道路。苟一年不得耕。害不淺矣。上悅。是日即詔罷之。明年改元洪武。上卽皇帝位。凡創制更革之典。君多預聞。上遇君厚。每字稱而不名。立浙江提刑按察使。以君爲僉事。階奉議大夫。君分部台溫二郡。經方氏竊據之後。全乖人道。爭訟以數百計。君悉理其曲直。而奏斷之。凡威取田宅者。歸業主。得半直者。中分之。兩造無驗者。籍之官。豪胥猾隸六百餘戶。悉并之別郡。僞官悍將二百人。其暴如虎狼。君出奇計。盡剷種類。遷於江淮間。民始安枕。方氏居黃巖。雖嘗簿錄其家。珠玉犀象金繒藏於姻家者。動以萬計。君皆搜索送諸官。溫有邪師曰大明教。造飾殿堂甚侈。民之無業者。咸歸之。君以其警俗眩世。且名犯國號。奏毀之。官沒其產。而驅其衆爲農。其地多倡家。中朝使者以事至。多挾倡飲。有司罷於供應。君下永嘉。令籍倡戶數千。械送之京。按使者以法鉤連。其他贓罪杖流之。僞萬戶金甲奪。

三人妻。其夫訟則更爲娶婦。君至。三夫皆訴。君論金棄市。各以其婦歸之。平陽軍校掠農妻五年。君攝其妻至。軍校恐。抱二兒泣曰。妻去。兒孰與養。願公憐我。君命實兒妻側。兒避不肯近。君曰。此非其子。詐也。詰之。果鄰家子。罪校如律。而斷其妻還於農。於是軍中所掠婦數百。皆相告語。夜遣去。一營幾空。平陽州吏目杜乙嗜財甚。考滿入京。謁御史中丞劉基。基詰謁故。杜惶駭不能對。遽命執訊之。杜自陳在州時斂民白金三十兩。又受楊某金。置殺人罪不問。守與佐皆相搆爲姦。有旨下君鞠之。同知以下吏皆服罪。獨知州梅鎰廷辯不已。民數百遮司門外。爭知州信無辜。君將聽之。吏白曰。今奉詔按獄。而釋知州不治。情則得矣。如身受故。出何。君再進民詢之。辭不變。歎曰。法以誅罪。吾敢身畏譴。而誅無罪人乎。釋鎰。以情聞。上可其奏。台臨海王參理妹有姿色。許適嵎縣竺氏。其內兄方敏覘其將嫁。夜率衆劫至家。逼爲妻。王詣永嘉侯朱亮祖訟。事下邑。方賄吏。欲傳輕典。君知有賄。急速吏治之。吏具狀。竟致方死罪。而歸女竺氏。兵克黃巖。時州民乘亂報仇。殺一家十餘人。永嘉侯受辭。令州捕鞠。州初附。假守捕殺人者十二人。獄旣成。吏受賂釋之。詭以死聞。縱其餘黨不問。君錄囚。廉得十二人。尙頸繫東郭民家。卽收掠問狀。抵官吏以贓罪。捕餘黨誅之。黃巖官署毀於兵。官寓尼寺中。并儲糧其間。君視糧過寺。尼數人來謁。皆美少年也。問孰爲主者。則方氏女弟也。君大驚。賜州守通判以下切責之。令逐尼歸俗。而以寺入官。州有宋杜清獻公墓。杜氏有田若干畝。入僧寺。儲其租以奉祀。僧挾與方氏連。奪田以爲己有。復墾田侵墓下。墓且蝕。其孫回以書聞。君執僧真諸獄。瘦殺之。追田與回。且令州立祠刻石以旌之。寧海強民陳德仲。以憾支解黎異。異妻

屢訴無爲白之者。君受之。一夕省黎事。有青蛙立案上。君曰。蛙非黎異乎。果異。則止勿動。吾復爾冤。蛙果如君言。明日逮陳誅之。縣民馮輔卿。至正中爲亂。與方氏連兵。旣而方氏追殺之。且沒其貨產。而餘田百餘畝。其豪奴吳自取之。輔卿妻杜。囚服迎拜馬前。訴奴君爲治奴罪。奏以田還之。台地產鹽。鹽賤而米貴。時官賣鹽一斤。責米二十五合。反貴於米數倍。復輸於杭。路險不可舟車。民病欲死。君上封事。乞民得償錢。民獲免轉輸之勞。凡事之未便者。君皆爲奏之。兩郡民灑然如更生。始兩郡旱。公所至輒雨。民曰。此熊使君雨也。是年秋。始立按察司於山東。擇其人行新政。上曰。無如熊鼎矣。遂仍前階。改山東開治濟南。濟南元有廉訪司廳事。壯麗甲諸道。臺檄君居之。時汪丞相廣洋以參政建行省其中。僚吏請君以臺檄白省而復之。君曰。官在政事何如耳。豈以公署之麗耶。城北有庫陋室。君就其中治事。丞相聞君言。戒其屬曰。此真憲官也。吾等慎毋犯之。山東爲齊魯之域。其民敦樸少訟。君鎮之以靜。而以保民爲先。時河北甫定。濟南宿重兵。兵肆暴侵民。莫敢與較。君移牒指揮司禁之。黠軍數縱火劫人。一家火。則一市財皆殫。君旣申火禁。督邑令庀火具。爲保伍相赴援。復懸書通衢。戢士卒。士不戢。坐所轄將。火患頓息。偏將有受部兵一繒者。君收問。連其黨獄之。諸將大駭。浹日出於庭。數以贖貨罪。准律贖金而縱之。諸將又大喜。由是莫敢橫恣。東平侯韓政鎮濟寧。奉旨按籍。選壯強爲兵。東平東昌濟寧三郡民皆驚散。將爲變。君急飛書行部。僉事段明德說韓侯止之。分遣官屬招輯。俾復業。越三月。民始定。州縣官多失廉平。君陰風跡數十輩。悉如法論罷之。六郡肅清。齊河有強盜劫商人布千疋。縣求盜逸去。吏索之村中。遇王氏婦。不得於姑。

出走。吏見其色動，執訊之。婦曰：我王六家人也。吏因考箠，使其誣服爲盜，訛爲王六家兒。且指平人三十餘人，榜掠無完膚。問王氏夫安在，衆不勝苦，詐云已殺之。沈於河矣。追所劫布及屍，無一是者。獄已具。君盡得其情，而王氏之夫故在。君坐官吏以法，而悉遣之。君患官好致訟，乃令郡若縣各置二廳，日著所治獄訟錢粟之績。一留郡縣。一上之憲府，遞更迭易。月按歷而鈎考之。凡所爲事，莫敢隱者。後遵以爲式。大明律初頒，吏莫能通。君日坐堂上，立六曹吏堂下，條授之。與之辯析，俾各通其法。名聲赫然著聞。凡疑獄皆質焉。上嘗廷稱曰：聞熊鼎爲政得體，朕甚嘉之。二年十月，臺臣奏山東憲司缺副使。上曰：朕得之矣。詔陞君爲之。三年四月，封建親王，擇王府臣僚。上御奉天殿，丞相以下咸侍。上首問曰：山東副使熊鼎，稱是選乎。衆皆曰：賢。上大書君姓字於几。復問禮部尙書崔亮曰：鼎何如。對曰：鼎誠賢。上曰：朕固以爲足任也。遂驛召君。五月，拜晉王相府右傅。階中奉大夫。會有事於方丘，君受告導駕。旣齋宿，習射苑中。百官鴈行入。上勅近臣以弓矢授君射。君文臣，素不諳習。一發中鵠，上喜，勺渾飲以賜。明日又射。上詔君至榻前，俯身御弓矢，爲射容以教君。君跪受弓，左執之，右手指一矢，韃二矢，向鵠三發，連三中。上嘉勞久之，將遣之。國上御端門，君及秦王相鄭久成等，以次就坐。上敷揚治國之道，逾數千言。反覆獎諭甚至。君等皆叩首謝。賜食而退。乘傳至晉陽，議建王都城，命工入山度材木，治瓦甃。四年，大興衆，築城作王宮。君夙夜不懈。七月，奉相府賀生辰表詣闕。至則車駕將幸臨濠，勅從行。數被召問，恩寵有加。九月，辭於臨濠。上倚馬詔以處將帥間協和之道。且曰：汝不善騎，勿庸自來。君還，會徙沿邊諸雜羌萬餘入內地，護卒勿嚴，道亂奔。

散。太傅徐魏公達發兵擒殲之事聞。詔使詰責參政曹興等。併免君官。左遷大同衛知事。五年召還。六月除晉王相府參軍。以尙書授王。復奉詔兼授秦王經。翰林學士承旨宋濂。時兼太子贊善大夫。復薦君說書皇太子前。君於書最深。每以帝王心法之要陳之。太子二王雅加愛重。明年上御文華堂。召君問曰。秦漢以來諸侯王不肖者幾何。君謝未攷。遂命之蘇州覈糧長罪狀。君至。擇其尤虐民者杖徒之。鳳陽事畢。復入王府。七年三月。上御西苑。復以諸侯王事爲問。君復謝未遑。改刑部主事。奪參軍所受俸。八年正月。授岐寧衛經歷。賜白金五十兩。錢萬三千文。上復念君在邊良苦。遣使持手詔諭君。詔上所親製。辭意甚厚。有狐裘纒袍毳襪之賜。時朵兒只把雖降。而持兩端。君上書萬餘言言狀。其略謂西涼岐寧漢唐內地。不可棄。朵兒只把非有歸向之誠。特假我聲援。脅服鄰邦。爲自安計。朝廷宜思制之之道。急之則必席捲而遁。雖得其地而無民。緩之則恐羽翼旣成而跋扈。宜稍給種糧。撫其遺民。以安衆心。而以良將參守之。則朵兒只把特匹夫耳。又將安往。上覽書曰。人謂熊鼎迂闊。今不迂也。九年四月。乃徵君還。次西涼府打班驛。遇朵兒只把叛兵。擁君北行。君力爭不從。遂與中使趙某等皆遇害。時六月二十三日也。壽五十有五。後數日。亂兵就擒。獲君所佩囊中公牘。始知君卒。跡其骸骨。葬於某地。西涼衛以聞。上感悼。遣使弔祭。命臨川恤其家。其子某以某年月日至某地。以其骨歸。以某年月日葬於某山。君學有應世材。內行尤修。飭仲弟渙。爲開封府延津縣主簿。受誣以賊罷官死。妻子漂流無依。貧不能償其贓之半。君以己俸代償之。致其妻子於家。諸姑適俞氏。夫與子俱喪。無所於食。君延養之終其身。喪葬之禮無闕者。與人交。誠樸。

不欺。臨事善斷。故居官必有名。曾祖某。祖某。父某。俱通經術。母某氏。有賢能。娶某氏。男若干人。女若干人。初君將之岐寧。子某來見京師。君口授所行事。俾書之。且曰。我死生未可必。或死。我無累汝者。當今惟翰林宋先生文可傳。我嘗獲先生知。汝以此拜乞銘。先生必憐汝。幸爲我銘。我無憾矣。嗚呼。余言豈足恃耶。而君惓惓若斯。尤可哀也。銘曰。

天祐皇明。以民授之。必生其人。俾左右之。啓國之初。俊才如雲。其心之貞。允惟熊君。執筆載言。侍帝黼展。從容論奏。爛然可紀。豈徒能言。亦見於行。繡衣直指。以蘇南氓。獨強刻穢。洗濯積垢。南氓稽首。君我父母。君車自南。民望於東。帝曰。汝來。唯民之從。齊魯千里。厥土歲荒。君居二年。化爲耕桑。帝謂相臣。鼎也可恃。不負吾民。寧負吾子。惟晉巨國。惟傅大臣。將終任之。命則孔屯。既入授經。復出治戎。狐裘毳衣。唯帝念功。封論邊事。其策甚偉。欲召用君。君則道死。天子聖神。用無遺才。天因其逢。賢者所哀。生有事功。歿多孫子。銘圖其傳。以示千祀。

元故累贈奉訓大夫温州路瑞安州知州飛騎尉追封樂清縣男林府君墓銘

府君諱邦福。字彥大。姓林氏。林出殷比干之後。辟地林山。因地爲氏。子孫分居清河。至漢太子太傅尊。遷濟南。晉太傅禮。永康間。又遷下邳。永嘉之亂。合浦太守祿。又遷閩之溫陵。自是閩中多林氏。唐貞元中。莆有孝子。攢爲福。唐尉棄官廬墓。致甘露白鳥之祥。詔立闕旌其門。孝子五世孫諱某。當五季時。仕於唐。及沒。夫人執氏扶櫬還閩。道經溫之瑞安。值閩亂。遂葬於縣之塔石村。有馴鹿之祥。人號鹿阡。執氏卒。合

葬其地。自後九世子若孫咸環葬左右。其諱文慶者。實夫人之九葉孫。生古溪處士諱益甫。復遷郡城。生台州路總管府照磨諱桓實。府君父也。照磨君以孫常官七品。當封父母。援故事讓於祖。贈從仕郎江浙等處儒學副提舉妣黃氏。贈宜人。府君局度孤寒。不爲屑屑詭行。弱冠出游。蘇府公廉其賢。辟爲史。蘇之寓公多權要。頤指氣使。州縣皆唯唯不敢較。府君毅然不爲屈。有請託者卻不聽。且曰。國法何可以徇人。積勞當調州之幕職。江浙行中書以筦庫缺官。借授處州松陽監稅。改監紹興如坻倉。府君釐革弊政。出內皆有程。顆粟弗私。轉嘉興陶莊務副使。時浙西大稔。民嘯衆斂餼糧。與抗者輒見殺。上官檄府君攝尉事。府君授以籌略。分遣弓箭手掩捕之。未幾皆獲。議法者悉付重典。府君走白部使者曰。飢民無食。雖萬死不顧。何往而不爲亂。原其初情。不過魚游釜中。少活須臾之命。如法家議。無乃太過乎。使者以爲然。免死者數百人。轉饒處二州。州之務居城闔。稅課每屈。府君運量有法。皆以最登秩滿。監衢州常山務。絳巾賊起沔陽。江浙諸郡皆繹騷。弗寧。時浙省左丞高昌公出鎮廣信。專總戎事。署府君常山尉。府君集義旅數千。淬礪戈矛。使習坐作擊刺之法。號令精明。部伍整飭不亂。狗鼠輩欲乘隙鈔掠者。皆吐舌散去。會子溫登進士第。擢休寧尹。尋補江南行臺掾。迎府君就養。未幾御史大夫子恣爲不法。人言沸騰。溫以親故未忍撻其姦。日恆鬱悒不樂。府君謂溫曰。吾能安吾貧。慎毋以老身不行其志也。明日溫率同列謁大夫。力斥其子之非。大夫慙甚。旣退。溫卽抗章辭去。奉府君還鄉。浙省左丞相康里公時承制得專封拜。擢府君鄉郡知事。郡民舉手加額曰。吾州害與利。林公知之。我民庶有瘳乎。適山寇竊發。掠慈湖。將窺城。上下

洵。府君白於府曰。事急矣。奈何。吾將以三寸舌卻之。乃單舸直走賊巢。諭以禍福。賊見府君至。大駭。爭持白刃相脅。府君厲聲叱曰。朝廷何負爾輩。乃敢弄兵反。藉使州縣賦斂急。或不能堪。當訴之方岳大臣。足矣。今乃自麗刑憲。官軍旦夕且大至。舉族當作菹醢。吾憐汝輩愚。特來示以生道。乃欲吾脅邪。吾不畏死者。任爾爲之。任爾爲之。賊衆愕眙相顧。再拜謝曰。明公言良是。微公。吾屬入鬼籙矣。皆俯首退去。爲良民如初。朝廷時遣近臣。經略江南。官有異績者。必超擢之。有司方以功狀聞。府君竟以疾卒。壽六十有七。府君明白坦夷。不尙鉤距。遇事曲直。輒辯白無少讓。人初難之。終服其明斷。性好施與。人有急難。振之唯恐不及。處伯仲間。無間言。尤篤於訓子。故卓然皆有成立。既而溫改福建行中書省。管勾。得請於朝。封府君文林郎汀州路寧化縣尹。夫人王氏。贈宜人。及溫累陞員外郎。加贈奉訓大夫。温州路瑞安州知州。飛騎尉。追封樂清縣男。夫人亦加樂清縣君。府君卒之日。至正十九年夏五月癸丑。葬之日。其年冬十二月甲申。墓在永嘉縣建牙鄉先塋之側。王夫人先十七年卒。子男子四人。長卽溫。奉訓大夫福建等處行中書省左右司郎中。次常。從仕郎泉州路德化縣尹。次嘉。福寧州知事。次寧。行宣政院宣使。子女子一人。適福州長樂稅課提領項昱。孫男七人。本乘。東乘。策。某。某。女四人。曾孫男二人。某某。女一人。嗚呼。天之生材也。一元之氣。旣運。無往而不周。譬諸木焉。或可爲棟梁。或可爲榱桷。未嘗不具。特人用之有違其材。所以每形君子之歎。有若府君。材信美矣。乃使之淹回下列。無以吐其胸中所蘊。及逢世亂。則建策禦寇。親往諭降。卒使革心從化。其氣量足以有爲。使之專城而居。必有赫著愷悌之政。奈何斷棟與梁。而以榱桷用。

之嗚呼。果誰之咎歟。然而天定終能勝入。府君固不遇矣。有子以詩書起家。爲時名臣。馳贈所及。至於二千石之榮。可無憾於九泉矣。濂雖不及拜府君床下。而幸與溫游。溫以前進士孔克表狀。走金華山中。徵子銘。義不得辭。銘曰。

天之生材。小大異宜。用或倒施。乃人之非。恂恂林公。厥材孔修。苟竭其蘊。可鎮方州。關市之征。曷我溷之。公笑曰嘻。我斯受之。料量既平。出內無愆。人或不足。我則裕然。山寇跳踉。鋒蝟斧蟻。以斂以攘。以撼大邦。公乘單舸。直入其阻。威容言言。其氣若虎。賊黠而疑。羣而趨之。執刀圍之人。爲危之。公聲如雷。震破賊膽。再拜稽首。今則焉敢。轉彼昏昏。易爲昭昭。棄其戈矛。爾黍爾苗。古有薦士。達諸巖廊。孰持使節。不發一彘。公雖不遇。有子承家。龍光炳煥。泉壤增華。建牙之鄉。馬鬣其封。史臣勒辭。無媿於衷。

元故湛淵先生白公墓銘

嗚呼。是惟湛淵先生白公之墓。先生諱珽。字廷玉。白其姓也。出於宋丞相時中之裔。世居文水。時中之從子翼。扈蹕南渡。官至防禦使。生武略大夫良輔。食邑構李。因家焉。武略之後。又至武功大夫顯。始占籍於錢塘。生修。武郎必騰。修。武生通。武郎燦。先生父也。妣方氏。先生本四明名儒。舒少度遺腹子。通。武育以爲嗣。五歲能屬對。八歲能賦詩。十三受經太學。習爲科舉業。轟然有聲場屋間。一時貴人爭欲出其門下。甫及壯。元丞相伯顏平江南。聞先生賢。檄爲安豐丞。辭不赴。乃客授藏書之家。晝繙夜誦。燈墜花穴。帽不知也。如是者一十七年。程文憲公鉅夫。劉中丞伯宣前後交薦之。復以疾辭。中歲嘗出游梁鄭齊魯。歷覽河

山之勝。登臨弔古。訊人物風土。慨然有尙友千載之意。及至燕。王公貴人見輒賓禮。或欲舉爲東宮官者。先生復引義固辭。南北孤遠。士久困逆族。則必昌言甄拔之。自是學益充。文益富。而家益貧。宣慰都事鮮于公樞帥一時名士。援杜甫邵堯夫故事。共買屋使之居。會李文簡公衍出將使指。喟然歎曰。有才如是。坐視其窮可乎。力挽起之。授太平路儒學正。先生不得已應命。未幾攝行教授事。悉心官政。修建天門。采石二書院。政成。當時事例可貢行臺令史。達官勸之行。先生笑曰。吾守章縫爾。他何覲哉。尋轉常州路儒學教授。兵燹之後。禮殿與堂廡皆廢弗治。祭器載籍亦闕。先生爲完之。且復侵疆三千餘畝。俄再遷教授。慶元未上。翰林集賢兩院謀曰。白先生淹回下列。吾儕不啓齒一言。可謂汗顏矣。共慰薦之。陞江浙等處儒學提舉司副提舉。階將仕佐郎。時鄧文肅公文原實爲之長。與先生志氣膈合。舉刺得宜。文化大行。秩旣滿。銓曹有不知先生者。署淮東鹽倉大使。先生自以鹽筴非所諳習。不俟終更。卽謝事養痾海陵。遠近學徒擔簦相從者。殆無虛日。先生已六十有七。及再遷從事郎。婺州路蘭溪州判官。則不復有官情矣。日與韻朋勝友。曳杖游衍。銜杯賦詩。惟恐日之易夕。所居西湖。有泉自天竺來。及門而匯。榜之曰滿淵。因以自號。晚歸老棲霞。又號棲霞山人。以天歷元年九月十五日卒。年八十一。其年十一月二日。葬錢塘縣履泰鄉棲霞山之陽。其子遵治命。題曰西湖詩人白君之墓云。先生性至孝。母病。刮股和藥。起瀕死者再。及歿。號慟自擲。嘔血至數升。父感奇疾。醫言必得兔屎可療。先生踏冰雪緣崖穴求之。三日不得。父死。抱屍哭絕。而復蘇。繼母虐。不子厥子。先生事之愈恭。旣而改適他氏。無儻石之儲。先生爲營朝夕。且負其避兵。

迄免於難。然汲汲行義，尤不顧家之窶。孤嫠不能婚者，嫁之。死而無所歸者，棄殯之。道中拾遺珠，待其人訪索，審而還之。或以質劑假金，匱乏不獲償，焚而慰之。生平無驕辭怠色，一以謙抑爲事。聞人善，未嘗不聽慕。見揚人過，掩耳亟避去。奉先之外，不惑異端，不諂瀆鬼神。疾疢憂患之來，一委之於天。自幼至老，無一日廢學問。故能長於詩文。紫陽方公回稱其冠絕古今。有英雄大丈夫氣。剡源戴公表元謂其注波五經之淵，披條百氏之畹。廬陵劉公辰翁又言其不爲雕刻苛碎蒼然者，不惟極塵外之趣，兼有雲山韶濩之音。皆確論也。翰墨雖屬餘事，亦有晉魏風酒酣，命二童持紙，懸筆一揮，疾如雨風，聲光翕然四達。而先生素志丘壑，以退以進，故位不逮名。君子惜之。先生娶沈氏，有賢行。前二十七年卒。子二，賁，文林郎南安路總管府經歷。采，温州路永嘉縣鎮海東寨巡檢。女一，歸常州路儒學正鄭禾。孫四，栒，越東明。皆早世。孫女一，適平陽宋允恆。允恆由紹慶路儒學正陞授新州新興縣福緣寨巡檢，賁以子天，命允恆仲子範爲後。範有學而文，能繼其家者也。範生子二，弦，女三。先生所著書曰詩曰文曰經子類訓曰集翠裘曰靜語，皆二十卷。嘗餞諸梓，四方多傳誦。嗚呼！先生已矣，濂也晚出，雖不能識先生，幸從鄉先生黃文獻公遊，聽談杭都舊事，有如淮陰龔公開，嚴陵何公夢桂，眉山家公之巽，莆田劉公漢，西秦張公樸，虎林仇公遠，齊東周公密，凡十餘人，相與倡明雅道。而先生齒爲最少，乃與羣公相頡頏。南北兩山間，其遺跡班班，故在。僅踰五十春秋，而先輩流風遺韻，弗復可見，不亦悲夫！嗚呼！死者固不可作，若并其言行而不彰，將何以爲？登善扶俗之勸，於是徇範之請，鉅細畢書之。嗚呼！先生之名，其果待文而後傳哉！銘曰。

虎林有哲夫兮。秉德良優柔。嗜義如嗜利兮。避名如避讎。指退以爲進兮。謙抑以自修。知分中自定兮。不假外物求。天經況所惇兮。血淚交頤流。冠冕百行先兮。倫品庶不儻。發越見聲詩兮。笙鏞間鳴球。律呂素和協兮。八音交相繆。雄章落四海兮。虹氣日夜浮。棲霞有名山兮。草木光如油。紀德薦石章兮。千古振諸幽。

汪先生墓銘

新安之婺源有隱君子曰汪先生諱炎昶字茂遠學聖賢之道不求聞於世年七十八以元重紀至元戊寅四月二十四日終於家初元旣滅宋宋太學生孫公嵩悲哀不自勝歸隱海寧山中誓不與接發爲賦詠以寄其無窮之思孫公同時進士許公月卿亦入婺源山中製齊衰服服之以識其終身哀宋之意此二公者皆新安之節義士先生受學於孫公而與許公門人交友故自少慨然無仕進志先生壯時元有天下已久宋之遺俗變且盡矣而先生衣冠動作語言禮度猶宋人也後生小子去宋遠無從徵之見先生咸以爲前代之遺賢而先生亦曰吾古逸民也學者因稱之爲古逸云先生少凝重記憶不能過人然刻苦專篤雖執匕據枕不廢誦習力久思深該貫宏博遂無所不覽要其歸宿精索於六經而詳究於孔子孟軻曾參子思之言參之以伊洛大儒傳註之說絲析髮解日攻月較不故求爲異而亦不苟爲同其所自得旣形於言雖不欲求人之知然人有辯其未至者必樂而從之終其身未嘗自以爲是也其教人履庭躋級具有條序爲文奇而不肆遇時觸物輒爲詩以達其情婉切悽壯人傳誦之蜀郡虞文靖公集

巴西鄧文肅公文原。皆盛稱其才。而先生志操之高。人莫之知也。先生家貧。事母能致其樂。母年八十九。先生亦老矣。夔夔祇肅。進食奉水。必躬親之。母爲忘其貧。先生將終。整冠坐。命家具疏食。少餐。置筯。戒諸子以祭祠之禮。言畢。正身斂手而逝。先生之曾祖諱冲。祖諱天衢。父諱季安。裔出於唐越國公華。娶江氏。生三男子。曰淮琛。照乘。棠金。照乘爲弟。禹玉後。一女。適詹某。其孫男三人。曰某某。先生所著有四書集疏。藏於家。詩文凡若干卷。先生卒時。棠金已死。淮琛貧。未能葬。命從子叡告於先生之門人趙君訪。請輯羣行爲狀。趙君以未葬辭。旣而淮琛亦卒。後十九年。至正丙申某月日。叡始買地葬先生於黃京山高路原。又以爲請。趙君乃爲狀。屬余銘。余諾之。未獲爲。去葬之歲。又二十四年。余欲銘先生墓。而趙君之死亦已久矣。於是撫几歎曰。先生之卒。今始四十餘年。而先生之子及門人。知其事者。皆已亡矣。使復越四十年。其能有知者乎。爲善者固冀人知己。然有善而不聞於來世。後死者之責也。乃本先生之志爲銘。以告世之知先生者。銘曰。

朔風荒荒。海水赤矣。宗社爲墟。將安卽矣。冠履倒置。命之忒矣。高蹈避世。舍道焉適矣。彼夸者子。羣趨弱矣。人之攸樂。我心戚矣。爲陵爲淵。孰失得矣。嗚呼先生。千載是式矣。

端木府君墓誌銘

予友端君以善旣卒之一年。其子智。衰經踵門泣拜而請曰。智也罪覺深重。禍延先公。以洪武癸丑三月乙卯。卒於南京之官舍。壽僅五十有三。遂以是年某月某日。葬於嶮山東村之原。竊惟先公自少有志事。

功其善政在人者。今多能言之。又十年則言之者或寡矣。又十年則無人能言之矣。此無他人遠者其言溼。世易者其事晦。亦恆理爾。一念及茲。寧不使人興懷乎。然而託名文辭者。可以垂之無窮。千百歲猶夫一日也。此爲人子者。所恃以無恐。願先生進之。按學子劉剛狀。君諱復初。以善其字也。姓端木氏。其先爲衛人。出於孔門弟子子貢之裔。今獨以端稱氏者。從省文也。一遷於大梁。再遷金陵烏衣巷。三遷於溧水縣之嶠山。其詳備見譜圖記中。曾祖時中。祖安。父邦達。妣某氏。君有遠志。不肯寂寂落人後。至正初。以儒試吏江南行御史臺。同列多貴遊子弟。爭事表襮。君獨泰然不失其恆行。久咸畏服之。俄遷書吏海右憲部君佐。部使者行州縣。彰善瘴惡。威聲獨著。聞會四方兵動。東南爲尤甚。君袖策言時政之急。如此則可守。如此則可戰。否則有斂手就降而已。上官聞之。皆落落不合。君仰天歎曰。彼以吾發狂言耶。時事從可知矣。於是悵然有鄉土之思。溧水道絕不能歸。僑居金華。日以書史自娛。至正己亥。皇上親御六軍取金華。命常忠武王鎮之。王聘君至幕下。未幾。君辭去。會有言於朝者。癸卯三月。召爲徽州府經歷。徽爲江東大郡。政繁而賦殷。君悉力佐治。百廢具舉。功則歸於其長。田賦久不均。民不堪命。君卽城東建局。使民自實田集爲圖籍。覈盈朒。驗虛實。而定科絲。吏民陰爲欺弊。痛譴之。不數月而畢。由是民無逋租。官無橫斂。三皇孔子廟。皆築臺門。旅館之制亦廢。君或葺或建。咸中程式。賦不及民。皆若不知者。丙午冬。改通判吉州府。吉俗尙譁訐。素號難治。君召父老子弟戒之曰。予聞爾民尙豪侈。樂訟鬪。朝廷子惠元元。春雨秋露。無不霑濡。爾盍爲良民以報上德。寧梗化以自戕耶。梗化弗祥。天刑所不貸。爾其識之。民皆惴惴。無敢執

牒妄訴者。丁內艱。服除。洪武辛亥春。被召赴京。除磨勘司丞。時官署新立。凡泉粟之出納。刑法之是非。物貨之變易。無所不當識。君從本達支。自流徂源。句稽隱伏。纖芥軒露。每一奏對。上輒廷譽之。未幾。陞爲令。君嚴於限域。人見輒畏。不敢有所請託。俄僚屬皆以貪墨敗。磔首東市。唯君能獨存清白之行。益表見朝。著聞。冬十一月。超授嘉議大夫。刑部尙書。君之用刑。本諸法律。而持以平恕。老於議法者。咸以爲允。杭州馬甲飛糧事覺。逮繫者百餘人。詔君往治其獄。分羣囚別所。人各鞠之。合其辭參焉。同多者情真。否則僞。郡守以下皆服罪。壬子春三月。拜湖廣等處參知政事。階中奉大夫。湖廣素號重鎮。屬兵戈蹂踐之餘。土曠民稀。君首下屬州民復業者。復其賦一年。次閱官書。凡糧儲轉輸。錢幣出入。與夫軍裝工役。皆預爲計。畫。且會官屬闕事不集者。其故何繇。皆曰。一省所轄府州縣二百有餘。遠者在千里外。每官多闕。其事因不集。君奏請於朝。擇在職賢良吏攝其政。不數月。無事不舉。民驚以爲神。旣而以事召還京師。俄以疾卒。元配石氏前卒。繼王氏子四。仁。義。禮。智。皆石產也。仁先卒。君天性甚孝。自遊宦四方。不能奉驢膝。下心常慊。慊然所得賜祿。恆歸以娛親。其奉已則泊如也。母旣卒。一念及之。輒潸然泣下。居官能守貧。嘗著座右銘曰。爲官實難。貧然後安。事有不可急。中存寬。又曰。心契止天。腳踐實地。人謂其能自警云。君狀貌秀偉。美鬚髯。音吐鴻暢。或治政弗暇。休夜則焚膏。命諸子環侍。取書之嘉言善行。歷歷訓戒。至夜分乃止。故翰林學士朱升嘗謂君爲人。其謙退似儒夫。其專謹似腐儒。瞻視精悍似俠客。掀髯談世事似辨士。而其精神超越。又似逸人仙者。君子謂爲實錄。予託交於君頗久。而著勳焯能。固後死者之責。銘烏乎辭。然而年

日已邁。文日已衰。無以應四方之求。近因燔毀筆硯。一切謝絕之。而中心猶以爲未慊也。雖然。智之所請。則有不得而忘情者。遂備采剛所錄。而繫之以銘。銘曰。

惟士也良。有志則剛。如挾干將。始晦而夷。出遇而熙。一躍而飛。筮仕府僚。因賦定繇。功而不驕。轉佐方州。革俗以媮。訓言繭抽。磨勘設曹。蠶絲羊毛。孰而得逃。進領秋卿。邦憲是經。中乎準繩。往蒞大藩。以執政原。江漢又安。材長如河。壽則弗多。其如命何。有子治經。足繼簪纓。縱死猶生。嶠山之原。木古泉寒。銘在不刊。

故新昌楊府君墓銘

越之新昌。有大山曰彩烟。與沃洲天姥鄰。而彩烟尤爲峻絕。遠望之如雲霞繽紛天際。故名山之絕頂。其平如掌。沃野數十里。桑麻蔚若。犬雞之聲相聞。或者媿之武陵源云。大姓楊氏。自隋末來居之。閱數百年。而書詩之澤。有引弗替。在宋之時。父子兄弟至連舉於有司。而嘉泰壬戌。進士壽。其仕爲尤顯。官終朝奉大夫。知廣德軍州事。贈奉直大夫。廣德之從子佑祖。亦由太學舉進士。爲婺之浦江丞。浦江丞生岳。岳生禔。禔生府君。諱居。字溫如。生三月而其母梁氏亡。父命乳母鞠之。性穎悟。八歲能賦詩。及長。聞天台於先生子惠傳。伊洛性理之學。執經而受其說。久之。融通諸家言。而貫以一致。神暢心怡。實欲起古人千載之上。與之晤語。旣又以爲言之不文。不能以行遠。復從同郡韓莊節公游。取文章大家日研摩之。其於分章遣辭之法。辨其類不類。尤嚴其界域。時先師黃文獻公。以文名當代。府君撰長書贊見之。公讀已。嘖嘖賞愛。更揭諸座右。賓至則指以示之。曰。是豈非文耶。公爲人極慎許可。其器重之若此。府君嘗以春秋學應。

試鄉闈不利。遂掩關不出。下帷而講授。四方學子趨之者如雲。府君日據高座。隨其性資而開導之。如蒙大霧而行。不自知其沾濡之至。學成而去。多著名於時。人問之。則曰我楊先生弟子也。恩義隆洽。不敢更名他師。府君性至孝。父有疾。晝侍左右。夜不敢解衣寢。臨穴之日。號絕於地。良久而蘇。歲時祭祀。必預齋戒。暇滌灌盛服拜跽。儼如祖考之在乎上。瞻塋有田。爲豪民所據。府君帥宗人白於官復之。仍創庵廬以居。守者府君介而通。莊而能溫。未嘗妄言笑。一動一靜。皆可爲式程。善古文辭。尤長於詩騷。著有愛齋稿若干卷。藏於家。府君出處之際。唯道之從。視不義富貴。真若浮雲。臨財尤廉。路拾遺金。俟其主還之。里有喪及飢餓者。恆周之。學者方自以爲得師。年六十六。不幸以洪武九年丙辰冬十一月二十日卒於家。明年丁巳春三月十九日。窆於金山之原。在家西四里而近。娶同邑趙氏。生男子四。長宗學。先卒。次須學。去爲浮屠。更爲梵唄。有聲叢林間。次願學。繼父之業。次口學。女子一。歸士族盛必勝。孫男一。自牧。女一。尙幼。予聞之。文者將以載道。道與文非二致也。自夫世教衰。民失其政。高談性命者。每鄙辭章爲陋習。拘泥辭章者。輒斥性命爲空言。互相譏訕。莫克有定。殊不知道與文猶形影然。有形斯有影。其可歧而二之乎。是可嘆也已。府君以超卓之姿。窮理攻文。孜孜弗之倦。務欲合而一之。亦可謂知道者矣。銘曰。大道流行。日月昭宣。非文載之。道孰與傳。安可歧之。徇於一偏。迂夫曲士。牢執弗遷。擿埴索塗。何往不顛。有倬夫子。式窺其全。以彼校此。孰爲愚賢。鑄石幽墟。過者察焉。

予居浙水東時得朱君好謙之文。嘆其善於修辭。惜未及與其交。而好謙歿於兵。及來京師。又得好謙從弟文昌詩。閱之。冲澹類漢魏。雄健如盛唐。復嘆曰。何朱氏一門之多賢哉。未幾。國子助教曾君旦初。同文昌冢子堅。持知嘉定州事。張術狀來謁。墓道之銘。蓋文昌之死。已四年矣。予重違曾君之請。不敢辭。文昌諱嗣榮。文昌字也。姓朱氏。出唐散騎常侍滿之後。滿本歙人。來徙金溪明陽里。世爲衣冠甲族。宋道州營道丞登生。太學上舍生恢之。恢之生銓。銓生貴清。貴清生仲梓。文昌父也。元初。避地桃峯。復遷家焉。文昌治舉子業。甚精。通毛氏詩。訓故折衷於朱子之說。毫分縷析。唯恐不合情性之真。下筆千餘言不休。走試江西鄉闈。立論與有司不合。卽棄去。一假古律詩以自見。歷代諸大家皆探微索隱。必欲得其旨趣。而後已。用功之深。出語輒驚人。然不特精於詩。其輕財仗義。尤人不易及。少時嘗以錢粟貸於人。一旦自責曰。蠅頭之利。其能汨沒男子之志邪。悉集受貸者於庭。取其所留質劑而焚之。其後家單。無旦夕之儲。恬不爲怪。人有憫其貧。畀良田百畝者。文昌疑其不義。辭弗受。鄉友罹患難。屬文昌爲之解紛。餽白金一鎰。爲文昌壽。文昌笑曰。吾雖貧。亦惡用是哉。卒直其事而還其金。至正壬辰。江淮兵動。里之無賴少年。相挺爲變。其首禍者。頗與文昌游。乃來說曰。公藏器於身。不以此時取富貴。尙何俟耶。文昌叱之去。遂與絕交。未幾。竟敗沒。文昌宗黨知事變不測。椎牛釀酒。起兵爲保障。屹然孤立數年。而羣寇不敢犯。文昌之謀爲多。僞漢陳友諒犯南昌。諸郡相繼陷。文昌曰。此非吾輩之力可支。盍各逃死乎。乃挈一族入閩中。雖備嘗險阻。略無怨悔意。後五年。國兵取江西。州縣皆入職。方文昌始還鄉里。卜居澄源上。遺落世故。絕無毛髮繫。

心所不忘者唯詩耳。因扁其室曰嘯雲軒云。東平穆敬來爲縣。欲起文昌爲縣學師。文昌曰。吾老矣。唯逍遙林壑爲宜耳。橫經講道。豈所堪哉。因固辭而去。性愛佳山水。自謂得堪輿家不傳之祕。稍暇輒布襪青鞋。登陟不少倦。不幸以洪武七年二月十四日卒。壽五十六。所著書有政鑒若干卷。燬於兵。尙存詩詞三百餘首。題之曰燹餘集。娶王姜二氏。王先十九年卒。子二。曰堅。曰重。堅卽請銘者。孫二。曰振振。曰繩繩。孫女一。某年月日卜葬明陽里長岡山。文昌所自擇也。夫詩之爲教。務欲得其性情之正。善學之者。危不易節。貧不改行。用捨以時。夷險一致。始可以無媿於茲。如君者。蓋近之矣。世之人不循其本。而競其末。往往拈花摘豔。以爲工。而爲詩之道。在是惜哉。銘曰。

詩之爲教。著於禮經。溫柔敦厚。本諸性情。君子讀之。豈惟多識。玩其指歸。感善懲逸。我甑生塵。我衣懸黼。非義之物。弗取諸人。如斯學經。庶可無愧。留連光景。敢曰吾事。彼蒼者雲。其色可餐。洗心滌慮。是躋是攀。髮猶未皤。嗒然觀化。何有外慕。無晝不夜。長岡之原。桂老冰寒。魂魄未歸。茲焉是安。諄書爾銘。詒爾孫子。慶源方深。其流瀾瀾。

故温州路總管府判官宣君墓銘

始濂游學諸暨時。與烏傷樓君彥珍。浦陽宣君彥昭。鄭君浚常。浚常之弟仲舒。同集白門。方氏之義塾。塾師乃吳貞文公立夫。蓋鄉先生也。彥珍最先還。而濂與彥昭。浚常兄弟。講學將一期。當夜坐月白。俟公熟寢。輒攜手出步月下。時皆美少年。不涉事。競跳踉。偃仆爲嬉戲。或相訾謔。或角觝其力。至不勝乃止。獨濂

樸慧易侮。不敢時相逐爲驩。彥昭於其間尤號雄俊。彥昭顛目穹鼻。須髯森然如戟。顏面鐵色。類河朔間偉人。見者莫不畏之。已而各西東散去。浚常仲舒之燕都。客太傅右丞相家。馴致顯仕。浚常官至僉江東建康道肅政廉訪司事。仲舒累遷太常博士。彥珍受太師德王薦。爲玉龍千戶所管民司長官。彥昭知印行宣政院。以年勞入選。擢承事郎温州府平陽州判官。轉本路總管府判官。歲辛丑。浚常早卒。後九年己酉。彥珍亦卒。又四年壬子。彥昭亦受誣以死。其幸存而未死者。唯濂與仲舒爾。浚常彥珍之墓。濂常爲之銘。仲舒謂濂不可獨後於彥昭。嗚呼。前後未五十年。而世變不可知者已如此。銘其可足恃耶。雖然。不敢辭也。彥昭姓宣氏。岳其諱也。世爲浦江人。生長富家。而不染綺紈之習。別無嗜好。唯購書不知休。或請脫衣巾以償。亦不靳。入仕極清白。凡所需之物。必取給於家。毫分不受於民。在平陽時。吏隸畏其不相容。各去而更他業。儒生有百畝之園。爲世家所侵。雖屢訴有司。輒以厚賄屬吏。連年不決。彥昭立斷還之。儒生函金爲謝。彥昭叱之曰。顧法當爾。吾豈私汝者耶。彥昭恐童奴陰受之。陽縛就地。持杖大聲曰。儒生所送金何在。童奴垂涕曰。某實不受金。彥昭釋之曰。吾姑試汝爾。後十日。儒生畫菜一本。裝潢成禮。入謝曰。判官清苦。敢以一菜爲獻。彥昭曰。是雖微物。終有私意存。遂題識而歸之。天大雨。民與軍爭箠。民曰。我物而軍取之。軍之辭亦然。絕無證左者。彥昭命裂而爲二。並驅出。使隸卒踵其後。軍忿譟不已。民曰。汝自失箠於我。何損耶。隸卒以聞。彥昭杖民。令買箠償軍。其在溫府。治聲如平陽。會大俠起東海。來攻府城。戍將問計於彥昭。彥昭曰。此烏合之衆耳。宜帥精銳。大開城門搗退之。寇果敗北。自是屢戰屢捷。戍將氣驕。頗易

之。寇乘隙入城。戍將被擒。而彥昭亦受縛。彥昭瞋目罵曰。天子何負於汝。乃搆亂邪。寇怒欲兵之。民翼蔽其背。泣曰。寧殺我。毋殺我判官。寇義之而止。彥昭得解。夜縋城而出。請兵於方繼連帥。欲爲殲滅之計。無有聽之者。彥昭知時事不可爲。歸臥孫井山中。已而元亡。大明受命。有詔起江南文學之士。而彥昭與焉。上將官之。彥昭辭以疾。不受。復還故山。彥昭之兄財賦總管府知事彥高。風流醞藉。爲多士之冠。彥昭與共論上下二千年治亂。至抵掌太息。間操觚成詩。酬答不已。襟懷冲曠。外物若不能擾之。兄弟又善音樂。遇風日和麗。對坐海棠洞底。取檀槽琵琶彈之。侑以樂府新聲。醞酒仰天而飲。不至於醉不休。會婚家乾沒里氓田。氓搥登聞鼓訴冤。誣彥昭關通州縣。以致事不直。彥昭實不與聞也。逮彥昭至刑部。婚家引伏部吏并罪彥昭。彥昭抗辭曰。我實無罪。奈何不爲白。行當於殿陛前辨之。吏怒。下獄幽之。彥昭氣憤憤無所洩。不食三日死。口鼻出涎涕。凝結鬚上成冰。實洪武壬子正月某日也。壽六十。其子騏收骨歸葬於某鄉某山之原。禮也。彥昭曾大父某。大父某。父嗣良。母某氏。妻方氏。生三子。長卽騏。次駟。次駘。女一。適洪某。孫男三。某某。嗚呼。彥昭之事情。其都凡如此。濂謹爲序之。皆出於人心之所同。不敢以私好變易其辭。蓋期傳信於來世云。復收淚而著銘曰。

非學之弗獲。胡軋之而使屯邪。非才之不揚。奈何不得以伸邪。百齡幾何。孰爲短長。達人大觀。其得喪固均邪。墓草荒涼。青而復黃。寧不使余感舊而傷神。涕淚而沾巾邪。

故處州翼同知元帥季君墓銘

元季之亂。江南諸郡多陷於盜。獨處州以士大夫倡義兵。堅守而完。及今上渡江。始降其城邑。故處稱善郡。是時起兵之士。麗水有葉君琛。青田有劉君基。龍泉有章君溢。與三君並稱者。曰季君汶。亦龍泉人。其舉謀興事。不甚相遠。其後三君在國朝爲顯官。故天下皆知其名。季君早致其事以歸。是以其功不顯。然其鄉人至今以之擬三君。則不以其位也。君諱汶。字彥父。氏爲季。元至正中。率壯士從石抹忠愍公。宜孫討賊。數戰數有斬獲功。授義兵萬戶。經略使李國鳳承制改龍泉縣尹。不就。國兵破處州。擢安南翼總管。會賀李二將叛。殺總制孫炎。處大擾。君勒部駐白岩。出其不意攻之。已而中書平章政事邵某亦引兵至。左右夾擊。遂誅賀李。復其城。事聞。陞處州翼同知元帥。賜白金孟文綺。青田盜葉賢三燒浦城。政和兩縣掠婦女畜產而南。君告胡總制深。伏兵平山嶺。邀擊斬之。出私財贖軍中所掠。毫倪遺還其家。民德君。肖像而祝者甚衆。洪武元年。上卽位。君入見於便殿。辭疾乞骸骨。上亦老君。遂賜宴儀曹。賜襲衣冠帶金帛。遣歸。居九歲。以十年正月廿六日卒。壽六十。君少讀書多智略。事親孝。服喪如古禮。族人貧者。買田以贖之。不能學者。延師以教之。外王父無嗣。爲立其宗人之賢者。且割田畀之祀。鄉民老無以養者。月予粟。病則施藥。死則給以櫨槨。民苦嫁女。育女多溺死。君說以父子至理。有育女者。以粟六斛養之。嘗出見羣嫗灌苗。色飢甚。遣以囊中金十兩而去。其爲人望之凜然。與之語溫然。久而知其爲豁然長者也。君曾大父諱泰來。大父諱權。父諱鏡。其先在宋時多顯者。娶張氏先卒。晚娶葉氏。二男子。槩。槩爲母弟。漳後一女。適張守成。孫男四。炳。允頤。允齊。允中。余與劉君基游。固聞君事。及君卒。槩復奉工部員外郎劉君狀趨京。

師請銘。且言將以某年月日葬於劍池鄉大運里某山之原。不可無銘。乃爲之銘。銘曰。元運將傾。四方震驚。海怪山妖。執殳逞兵。括有季君。實奇壯士。手麾義旌。從者如水。左捕右攘。朱衣銅章。卻而弗居。以待真王。真王之興。雷轟風行。執戢守臣。敢觸天刑。長劍如林。萬夫一心。扼其咽喉。執斧礮平。帝念峻功。賜金賜爵。掃除東南。罔敢不恪。飛龍御天。虎拜陛前。禍亂既息。乞身林泉。帝曰歸乎。齒則既多。大帶巍冠。輝於鄉閭。鄉閭有言。君績孔偉。死而弗朽。不在太史。揆行考勳。以焯以宣。遺德在焉。彌久而傳。

莆田陳府君墓銘

君諱中立。字誠中。姓陳氏。莆田之忠門人。其先有名昶者。宋紹聖間舉進士。官奉議郎。曾祖諱子文。祖諱君保。父諱高。有學行。學徒私諡曰靖逸。翰林侍講學士晉安張公以寧銘其墓。母林氏。君季父諱齊。早死。無子。君以祖命後之。少受經於溫陵盧公琦。公以文章著稱。君聞其指授。色承心解。日寤月邁。莆士皆歎服之。元至正間。部使者行縣。集經生試。君輒魁諸生。會張潞公素以修撰使莆。見君文誦而奇之。由是君名益著。然就有司試。卽不利。君語人曰。我命薄故爾。非吾文之罪也。遂隱居。不復有仕進意。晚乃結廬壺山。年五十有三。以國朝洪武十一年正月十二日終於家。君事先有禮。每諱日必素服悲哀。至終身不息。初君之祖暨父欲營義塾以教里中子弟。規制未備而歿。君繼先志。創廟建學。學後爲祠。祀艾軒。晦庵。夾溪三先生。復爲祠廟。右奉其師盧公之主。講說有堂。燕居有室。凡學之制。無所不完。割祭田十餘畝。以食爲師者。儲山園之利。以資春秋之祭。凡爲淑人善俗之計者。又咸極其慮。君日陳經傳。爲學者剖析聖賢。

大旨。鄉人賴之。嗚呼。世之爲士者。其未遇也。常以無位。不足施其所學爲憂。及既得位。則又顧畏怯縮。爲其身謀。終無所益於人者衆矣。夫豈知君子之爲善。固不在乎位之大小哉。若君者。一介之士。未嘗受釜庾之祿。而汲汲焉以化其鄉人爲心。其亦異於懷祿尸位者多矣。君配國清林氏。子男曰堂。曰基。女二。長適郡人。顧初。幼在室。皆林氏出。堂將以是年某月日葬君於某山之原。請於太史氏濂。濂嘗銘君母墓。聞君行宜銘。乃銘曰。

維古之士不以位。世降俗媮。位斯貴。貴而無能。冠狗彘。豈若夫君。賤爲庶。居家孝友。推以義。關廬建學躬訓。蒞鄉耄如雲。聆且肆。少長斷斷類洙泗。化豔爲良。暴更懿。醇儒爲功。斯小試。嗟哉。後人繼其志。廟祀勿忘。欽永世。

故詩人徐方舟墓銘

庚子之夏。皇帝遣使者奉書幣起濂於金華山中。時則有若青田劉君基。麗水葉君琛。龍泉章君溢同赴召。遂出雙溪。買舟泝桐江而西。忽有美丈夫戴黃冠。服白鹿皮裘。腰綰青絲繩。立於江濱。揖劉君而笑。且以語侵之。劉君亟延入舟中。葉章二君競來謹譴。各取冠服服之。竟欲載上黟川。丈夫覺之。乃止。濂疑之。問於劉君曰。此何人斯。諸公乃愛之深耶。劉君曰。此陸之桐廬徐舫方舟也。濂故聞方舟名。亦起而鼓噪爲驩。共酌酒而別。聲迹不相聞者久矣。自時厥後。葉君出守南昌。沒於王事。後五年。章君爲御史中丞。以卒。又後十年。劉君亦官至御史中丞。受封伯爵。投老於家。復以一疾不起。又二年。濂亦乞骸骨還山。白髮

垂頷頽然成老翁矣。今年冬來朝京師。忽方舟之子膺持中書舍人史靖可之狀。來謁隧道之銘。則知方舟之死。已歷一十二年。嗟夫。人生如寄。石火電光。真不堪把玩如此。良可悲哉。濂因語膺以舊事。爲之悽惻者久之。乃序述其事曰。方舟故簪纓家。自幼有俠氣。好馳馬試劍。兼善攻毬鞠之戲。視拘拘法度士如無物。稍長。幡然悔曰。此豈君子道哉。卽從師受章句。爲進士業。操觚爲文。輒爛然成章。已而又悔曰。是如蠹書蟬。出入於故紙中。何有終期哉。人生貴適意。曷習古歌詩。以吟咏性情。庶幾少遂其願耳。先是陸多詩人。唐有皇甫湜。方干。徐凝。李頎。施肩吾。宋有高師魯。滕元秀。世號爲睦州詩派。方舟悉取而諷咏之。鏤肝劘腎。期超邁之。乃已。積之既久。圓熟璀璨。明珠走盤。而玉色交映也。方舟猶以爲未足。出遊江漢淮浙間。與名士相摩切。而詩道益昌。江浙行省參知政事蘇君天爵聞其賢。力欲薦之。方舟曰。吾詩人爾。其可廢以章絨耶。竟避去。築室江皋。日苦吟於雲烟出沒間。翛然若與世隔。因自號曰滄江散人。天大雪。獨泛舟釣江中。終日戀戀。若不忍舍去。見者疑其非世間人。元季兵亂。益韜閉不出。易爲隱者服。人莫知其蹤跡所在。有瑤林滄江二集各若干卷。唐詩通考若干卷。藏於家云。方舟平居。喜怒不形於色。無急步。無疾呼。莫測涯際。性尙風義。宛陵羅氏率五百指來避兵。方舟衣之食之。病者注藥。死無所歸。則擇地藏之。久而弗懈。事平。具巨舟載其還家。至正丙午正月九日。方舟以疾卒。壽六十八。某年某月日葬於某縣霞川之原。君子稽其自號。題曰詩人滄江徐方舟墓。表其志也。方舟高祖某。宋四川制置使。曾祖某。某路提舉。常平公事。祖某。始自澆安遷桐廬。今爲桐廬人。父子奇。元中順大夫。平江路總管府治中致仕。妣皇甫氏。

妻張氏有婦德。前二十九年卒。子三人。長曰行。蚤世。次曰鼎。次即膺。以文學受薦。授淮安桃源丞。女二人。適某某。孫男九人。曰某。曰某。云云。孫女二人。未行。濂謂君子出處。固立志之不同。然亦有命焉。當劉君之出也。銜方舟以隱自高。數欲挽起之。會有故而止。方舟獲終老於山林。亦豈偶然之故哉。予思方舟其人。而不可得。俯念疇昔。盡然傷情。乃歷序其故。而銘之曰。

有才不施。一發乎時。日星月露。草木走飛。人事變遷。可愕可悲。舉無遁情。入我範圍。咳唾所及。皆成珠璣。一旦觀化。魂無不之。非湧醴泉。定生靈芝。昭德之符。千載弗墟。洪武丁巳冬十一月。具官宋濂造。

亡友陳宅之墓銘

嗚呼。吾宅之死矣。銘非濂孰能爲之。初濂讀書浦陽江上。宅之侍其舅氏吳徵君長卿來游。濂始識之。徵君淵澄山聳。發言不繁。而成中肯綮。宅之氣象雍容。揖讓合節。鳳和鳴而玉鏘如也。濂心異之。進謁徵君。退必與宅之言。問其所從師。則韓莊節公性。黃文獻公潛也。問其所學。則治經爲進士之業也。濂時頗有志應舉。相與詰難經義。連日夕弗休。迨別去。猶依依南望。至日落乃止。自時厥後。宅之聲譽日起。大夫士唯恐內交之晚。廉訪使者行部。舉爲稽山書院山長。宅之辭宅之意氣方豪。謂朱紫可以引手致。及試藝有司。數上數不利。乃撫几嘆曰。慈親年高矣。予髮亦種種。安能逐三五年競。一日短長耶。卽退隱大山。中朝夕親側。不敢少離去。濂聞而悲之。至正戊戌。濂避兵徵君家。已而遷宅之之西軒。濂攜室人賈專及仲子璚。長孫慎。三世爲四人爾。心膽戰掉。若喪家之犬。宅之煦嫗而軫存之。視濂猶弟兄。遇璚與慎有若

子孫宅之內子蔣夫人亦視專如妯娌然。濂安之百里之外忘其流離顛沛之苦者宅之夫婦力也。浦陽既入職方濂挈妻孥而還庚子之夏朝廷遣使者來召濂趣裝上南京擢爲王官與宅之別者閱十春秋其依依之懷猶浦陽南望時暨以病予告東歸思宅之心逾切病間竟騎驢往見宅之大喜履齒殆將折留連浹旬椎羊豕以爲饗當夜半酒酣敍兵火離合語刺刺不能已既而掀髯高歌聲調激烈一吐壯年不平之氣濂復悲其壯志雖不衰然亦頽然老矣居亡何濂復起修元史進官禁林又將十年而璉同慎亦俱竊祿於朝濂私自念皇明圖任黃髮以開文治如宅之者年縱邁豈丘壑所能掩將以其文行上聞璉慎咸爭曰陳先生老矣得毋不可於意耶乃止洪武丁巳春濂蒙恩休致於家始知宅之歿已五年矣欲如昔日一見有不可得矣追念今古不覺潸然出涕專亦思蔣夫人之切復念宅之固云歿而夫人尙無恙行當會以慰中心之懸懸近有自諸暨來者則又曰夫人之亡亦已三月嗚呼悲夫濂知宅之深者宅之歿矣銘非濂孰堪爲之宅之諱堂宅之其字也姓陳氏其先襄陽人十一世祖宋國子助教旦始遷於杭生餘姚知縣愨再遷諸暨陶朱里曾大父某大父琳承信郎提刑司幹辦公事娶吳氏吳居縣東之流子里生子曰燦宅之父也仍娶於吳遂依女氏以居爲流子里人宅之壽七十有七卒之日乃癸亥十一月六日閏月二十三日葬於戈溪之源娶黃氏壽六十前十五年卒繼配卽蔣夫人有婦德鄉人稱之壽七十四後五年卒子男四鍊鏐鏐鏐亦前五年卒女二適吳義吳璉璉徵君長孫孫男六濟溫浦潤浩潛女二尙幼曾孫男四樟權梓橡宅之性雅飭行乎患難能以理自遣室廬蕩於兵燹亟

邊別墅。曾無幾微。見於顏色。每速故人。飲酒賦詩。以自適。其詩韻度深婉。一篇出。人競持去。閭井之間。恆樂親之。久而不厭。徵君家將合族爲義居。宅之左右。徵君爲定科條。以齊子姓。至今守之。嗚呼。宅之已矣。而徵君亦作土中人矣。上距避兵之歲。僅二十年。人事變遷。何所不有。未知後二十年。又爲何如也。唯有善名著於時。述作傳於人。雖歿猶不歿也。如宅之者是已。銘曰。五彩弗施。不如赭泥。我哀乎宅之。受才則丕。其數則奇。我哀乎宅之。斂其奮飛。發於聲詩。我哀乎宅之。墓門有碑。太史勒辭。是足慰多士之思。

金陵杜府君墓銘

金陵有孝義之士曰杜君諱元。字一元。其先居吉之吉水。與會稽正獻公衍同宗。至君始遊江東。樂金陵土俗。遂居之。而爲金陵人。君苦學有材氣。能爲詩。元重紀至元中。張文穆公起巖爲江南行臺中丞。見君詩。願掾君。君不可。欲以茂才異等薦。又不從。年若干。卒以布衣終。君少時。父患腫疾。夜數驚。君冠帶伏父榻旁。父驚起。輒抱持曰。兒在斯。父疾數月。君目不敢瞑。至愈乃已。母歿。服喪得古禮甚。聲聞日起。貴人賢士多樂與君游。君未嘗以事干之。及有罷黜失志者。則爲之力。不怠。行臺都事楊惠被劾去。人莫造其門。君獨持酒與飲而送之。趙弘中爲御史掾。坐法罷。君徒步與俱行百餘里。僦屋居之。儒學教授張鉉以事黜。君出金帛資其行。其子四歲失母。君命婦鞠之。不異己子。兵部主事常允恭家人夜失火。允恭方醉臥。衆怖懼散走。無賴子利其貲。將劫之。君率少年數十輩爲出其篋笥寶貨於外。允恭泣謝曰。徵君吾其死

乎。鄰人陳鼎舉室死於兵。二兒匿舍側。怨家復害其小者。君曰。脫并殺其兒。則陳氏絕矣。卒爲抱匿。他所以免。吉之部運使輸糧金陵。不足者三千斛。吏受笞榜。號泣莫爲計。君憫之。爲貸於大賈以償。吏德君。以物來謝。君卻之。蔣山僧爲御史所誣。夜竄君室求救。君藏之。故人家僧獲全。宋楊忠襄公邦乂廟在城南。君以公吉人。歲時率吉士游寓者。具牲酒祭之。君之爲義多類此。君嘗攻醫。尤良於治證。疾病造君者。不問有無。必予藥。藥必擇精善者。服之必瘳。金陵大疫。君和藥走給之。不得食者。以薪米餽之。賴君以生者甚衆。由是人多稱君美。及兵亂。士卒相戒。不忍犯君。卒於至正丙申七月九日。以丁酉三月十日。權厝金陵清涼山右國朝洪武壬子十二月九日。復改葬南門外之鍾家山。夫人劉氏。附焉。君曾祖若海。祖懋。父文燁。母周氏。君二男子。曰珙。曰環。珙早卒。環承事郎。晉相府錄事。賢而能文。精於書。得晉人筆意。二女適蕭伯高。鄧世良。孫男二。某某。孫女四人。皆在室。環與余交頗久。以銘爲請。余惑乎世之交友者。利之所在。則趨。有小害。則避去。不肯留目一顧。或道上相值。輒引袂掩面。陽爲不識。倘以事過其門。策馬疾馳。惟恐爲所汗。況望其拯卹乎。若君者。可謂無讓於古君子者矣。烏可不銘之。以爲世勸乎。君所爲詩若干卷。藏於家。銘曰。

杜裔孔鉅。支著吉水。其在金陵。則自君始。君才旣多。胡不祿仕。非不樂仕。義不屈己。養氣爲文。五色有煒。孰非公卿。接跡交軌。彼徼其權。權銷志沮。吾守吾義。夷險一揆。章服之加。聲帶之褫。所交者心。加褻何與。拯難濟危。存孤恤死。匿名之求。惟義所止。兵戈如林。白骨千里。君若不知。左孫右子。斯豈人爲。天錫嘉祉。

天曷私君。惟善之致。貴有不聞。賤有足恃。刻文昭美。以諗多士。

臨海方府君墓銘

君諱濬。字德明。姓方氏。台之臨海人。五代時有以武顯者。居臨海仙華山之東。號東山方氏。君其後也。曾大父仲。大父賢。父奎。母韓氏。君少孤。能自拔擢。超出流輩中。誦書不求多解。務見於用。持身有威儀。不妄譁笑。儼薄子過其家。踏步傾耳。不敢出聲。喜延攬賢士。至則沽酒與飲。取其歡忻。不顧惜貲費。人有過。弗匿於心。輒面折之。遇流俗則不肯舉目視。至門亦不與語。是以所交皆台之有名者。元季或薦名於朝。授江浙等處儒學副提舉。不赴。會方左丞據海上。賤儒多倚之。求利祿。君獨避匿。日與里中故老。緣躋山水間。歌吟忘返。庭有鉅楡。每醉餘盤旋其下。晚乃別號楡屏翁。一旦得疾。正衣冠危坐。抗手與視疾者訣。頃之乃逝。年六十。時至正二十六年二月十日也。娶牟氏諱巽。事姑孝。宗族稱之。年五十有八。以今洪武二年二月二十一日終。五年十二月九日。合葬於仙華山之原。四男子。仁。義。禮。本。禮去爲浮屠。本以才薦擢起居注。遷徽州府通判。改知金壇縣事。有政譽。一女適董宏。孫男六人。組。忠。良。桓。金。瑰。女三人。長適韓載。二尙幼。本爲起居注時。與余同朝。屢以銘爲請。未果。爲及余致政。朝京師。本至自金壇。重以爲言。退則自狀羣行。使忠來速銘。其辭文甚。於是知君善教子也。銘曰。

維蔓方氏。本於方雷。事軒與舜。曰明曰回。叔佐周宣。功侔尙父。紘在西漢。始徙南土。南土之方。皆祖於紘。派別支繁。維歛爲宗。台之方氏。始自歛分。或昭或泯。不大有聞。君之先人。嘗以武顯。君隱不仕。乃篤爲善。


善積在人。彰善者天。其將熾然。胤子孔賢。

莆田黃府君墓銘

莆田黃處士有良壻曰陳熙。哀處士之早亡。自狀其行千餘言。走三千里來京師請銘。且曰。處士事繼母孝。庶弟出後從父。從父愛其女。盡以腴田嫁之。處士患弟貧。割以私田之半。族人以田來鬻。處士不忍取。乞以直而歸之。不能爲生者。加衣食焉。以貲多爲閭里之正。里中民買鹽於官及科繇不能庚者。出私財代輸。有受誣者。諍之於縣庭。得解乃已。每歲首縣次民貲力多寡。定征斂之籍。衆不能決。處士發一言皆稱平。爭訟者來質是非。告以理法。舉酒飲之。各謝而退。藝田者歸粟。入以小量。遇凶歲則減買以大量糶之。初郡南有僻壤。盜常狙伺以剽行旅。處士構廬棲僧。夜則燃燈達曙。盜散去。復施貧死者棺。三年至二百餘。野無暴骨。元末兵亂。縣命處士帥兵扼險。晝捕賊策陳於上。民藉以安。處士讀書有識。待物恕以和其生也。鄉人教其子俾取爲法。及其沒。識之者無不弔。弔者哭必哀。至今言善人者稱焉。熙又曰。處士之善蓋多。其類如此。其使人感且化者不得而知。亦不得而言也。然其大者旣不可言。尙可言者。又不得託文以傳焉。則何以使爲善者慕。敢請。余曰。處士之行。誠可傳矣。余言之不文。烏足以傳耶。雖然。不可辭也。處士諱已。字景陽。自唐屯田員外郎潛之子。勗不仕。至審知始自光徙莆。在宋稱書詩之族。高祖審再以進士舉於鄉。與從兄某州通判君亮皆有名。曾祖文子。以五經爲州學諭。祖來。鄉貢進士。父元壯。母陳氏。繼母鄭氏。俱名族。處士娶林氏。無子。先二十年卒。再娶李氏。生子男四人。興祖。振祖。光祖。麒祖。女三人。長

壻卽熙其二適吳某。王某孫男五人。隆庸洪某。處士初爲長女求壻。富人爭欲問名。不聽。聞熙儒士。許妻之。或謂熙貧非偶。處士曰。我志決矣。卒妻熙。熙今爲連江儒學教諭。有文名。君子又多處士善處其女也。處士年四十二卒。元至正十八年八月廿九日。後五年。殯鳩山下。廿七年十月十二日。權窆山之西。今洪武十一年十二月廿八日。始克葬於白砂之原。銘曰。

人不患財之不贏。而患善無可稱。善集於身。雖賤爲恆氓。歷千載而有聲。身爲鄙夫。雖位居九卿。溘旣死而誰名。維處士君。足不出州里。而化者衆。身服乎章布。而德可程。斯之謂死而如生。



宋學士全集卷之二十

墓誌銘

故奉訓大夫僉提刑按察司事王府君墓銘

濂梁王佐其先府君之歿越六年矣。今奉工部主事杜君環狀來徵墓門之銘。不覺爲之愴然而悲。蓋當皇上飛龍淮甸。定鼎江表。弓旌四出。旁招俊乂。濂時應聘而起。擢典儒臺。而府君亦杖策轅門。思以助業。自砥礪薦紳之士。多矚目禮之。濂雖不泛與人交。聞府君崇論宏議。亦未嘗不傾耳而聽。及退。每自愧自歎。以爲弗能及。自後離合靡常。迨濂再召入禁林。府君已作土中人。載感疇昔。銘欲不作可乎。按狀府君諱濂。字習古。濂州定遠人。曾大父某。大父某。皆肥遯丘園人。號善士。父子良敏。給而多智。定遠令酷愛之。俾爲書佐。未幾補吏尉司。遷霍丘縣。以積勞升安豐府史。達官知其能。辟爲河南行省理問掾。未命而終。母蔣氏。府君嗜讀書。知彝倫大義。習爲聲詩。音節韻趣皆有法。推擇爲定遠縣吏。出謀發慮。皆中肯綮。令長以賓禮遇之。元季政乖。豪傑並起。府君拊髀歎曰。事急矣。保宗社以拯黎民可也。乃走穎亳。說其軍帥曰。民罹虐政。不得已起爲亂矣。當思有以靖之。虔劉人以逞。所謂如水益深。如火益熱者也。無乃不可乎。軍帥聞其言。以爲才。交薦之。擢萬夫長。五轉至工部尙書。非其所好也。當是時。盜稱名字者。皆烏合之衆。散漫無統。所經之處。唯務焚掠。千里爲荒墟。府君察之。度必無所成。謂所親曰。區區豈欲從戎哉。奮不顧

身出編虎鬚者。志欲生烝民也。今若是。猶魚游釜中耳。竈火已然。尙自謂得計耶。吾聞眞主已建都金陵。寬仁愛人。四方之民。爭引領望之。不去。禍將及。於是乘間挈家南渡。府君之婦兄太師李韓公善長。時已在左右。亟言之。召見於青龍殿。與語大悅。會新設執法議理司。方將選人以授。遂詔爲執法官。府君悉心詳讞。務協厥中。人稱爲平允。丹陽令白齊因公致罪。當棄市。府君以情可矜恕。敷奏上前。得貸死。知應天府。王子謙坐事械繫者久。府君惜其材。議從末減。由是上簡注之深。陞爲中書員外郎。轉遷提刑按察司事。階奉訓大夫。府君巡行郡縣。見貪墨蠹民者。必擊去之。唯恐弗亟。餘則務存大體。觀風宣化而已。一日天大風晝晦。上下詔求直言。府君歷述災傷之病民。竟爲之罷徵。俄得末疾。家居者久之。以洪武三年四月二十七日卒於京城之寓舍。壽五十有七。以九年二月日葬於某山之原。娶李氏。子男二人。伯曰曠。先十八年卒。仲曰佐。卽來徵文者。篤學好古。凡法帖名畫。多能鑒定。且善虞世南書。以材選充忠顯校尉。飛熊衛千戶所鎮撫。女二人。適會某孫志遠。高某。孫男一人。寧安。府君軀幹昂聳。而容貌潤澤。恂恂儒者也。或共其論議。輒掀眉吐氣。指方畫圓。袞袞數千言不休。臨大事之際。神采精緊。毅然有不可奪之色。與人交。愈久愈敬。遇急難。必蹈湯赴火。援之。若行事有過差。復面折不少恕。性又慈惠。凡貧泉布者。不納息。弗能庚。則皆實不問。遇凍餒者。如身受其病。思輟粟帛濟之。乃已。其在戎行。專務以不殺爲勸。且導人辟兵之方。賴以生者數百人。至於事親盡孝。奉意承顏。唯恐毛髮有違。故鄉邦尤稱之。咸曰。孝如王習古。庶幾無愧。嗚呼。爲士者。內行修於家。外行有以澤諸人。可謂不負所志者矣。銘曰。

民吾同胞。不幸亂離。屠劉之何爲。我務生之。海寓載清。式簪且纓。正色立於庭。我竭其誠。嗚呼。唯行之腴。契道之符。不亟不徐。循序而詳趨。其亦有識之吉士也歟。

元故行宣政院照磨兼管勾承發架閣鄭府君墓銘

至正乙未十二月二十五日。故行宣政院照磨兼管勾承發架閣浦陽鄭府君卒。年五十六歲。以是月二十九日。卽葬縣東三十五里大樊山中。去白麟溪三百步而近。越四年己亥七月六日。夫人吳氏亦卒。年視府君踰四歲。越一十五日。而少房勞氏又卒。年視夫人而少一十四歲。其祔葬府君之穴。夫人則是月十一日。勞氏則一十五日也。府君二子。漢沂。以架閣君既棄捐。今半月間。二母又相繼卒。慟哭將欲無生。請從兄温州路經歷泳狀其羣行來徵銘。府君諱銖。字彥平。其先出於鄭。遂以國氏。自公子友受封至今。世系皆可考。詳見世譜錄中。其由滎陽徙歙者。則宋歙縣令凝道也。由歙遷睦者。則殿中侍御史自厲也。自睦徙婺之浦陽白麟溪者。則淮也。淮字巨淵。於府君爲八世祖。淮生照。照生綺。綺生聞。聞生運。運生政。政生德璋。處之青田縣尉。府君之大父也。父文厚。母葛氏。府君自幼輒失怙恃。鞠於世母周氏。府君事之以孝。聞年十六。善爲廢舉之術。未幾家大穰。府君自綺以來。八世同爨。朝廷嘗表爲義門。子姓之多。至數千指。府君與兄欽營田八百畝。有畸。建嘉禮莊。以給婚媾之用。俄撫脾暗曰。太阿在室。孰知其有剗犀刺象功。丈夫不能用世。亦猶是爾。予將爲萬里游。當必有所遇。卽弗遇。歸老丘壑。亦未晚耳。於是戒行李。與親舊揖別。從以三蒼頭。上馬徑去。迨至京師。諸公貴人。爭相引重。時脫脫道濟公入秉鈞軸。日以致太平。

爲務。一才一藝無不甄拔。見府君儀觀偉飭。器之奏爲行宣政院照磨。宣政蓋統治江南諸道浮屠氏事。權至重。浮屠以幣交者。府君絕弗復通。門庭肅如。浙江行省右丞相朵兒只公以元勳碩德。方領院事。察知府君之廉。命持檄行浙東西。一髮無所取。諸浮屠嘆曰。凡受檄來者。恆欲得重賄。不奉命則禍立見。聞其還也。錢積至數萬。今鄭君囊中蕭然空耳。其廉吏也哉。由是院之推廉吏者。一則曰鄭君。二則曰鄭君。云。轉松江等處稻田提領所大使。嘉定華亭上海之交。有田二十頃餘。既隸所中。而都水使者汨江淮財賦。府復重賦之。民日困甚。府君爲聞於朝。免之。先是徵民無藝。歲有羨糧。以斛計者萬餘。上下共利之。習以爲常。府君至。獨曰。是安可哉。命給還於民。吏爭以無主名爲解。弗聽。乃計種家口數分之。望門而拜者。日以千數。稻田所素號米貨之府。而爲之使者。又總覽其綱。他人靡不思遂其欲。府君日糴於市。處之猶貧人然。會從子洵來省覲。一夕病卒。府君哭之慟。且曰。人生不翹朝露。何以官爲。即日解印綬而歸。居亡何。亦以一疾不起。府君性精密。不妄嬉笑。遇事各有條理。不可越尺寸。聲嗟氣嘆之間。諸奴畏之。甚於鞭笞。吳氏諱雙。字齊祺。生女曰潤。歸義烏縣丞洪士濂。勞氏諱觀。漢沂蓋其所出也。吳性平恕。而誠懇。宰物必均。寧己劣於人。府君出游京師。日禱於上下神祇。及有疾。猶扶億東面叩頭再拜。遇漢沂慈甚。媵人報其安寢。目乃瞑。不得報。輒輾轉至旦。勞氏亦奉承惟謹。同處三十年。穆如也。次女曰澹。許適黃育。其母曰珊奴。嗚呼。府君在家能孝。居官復以廉聞。可謂賢也已。銘曰。

厲行於門。一何哲也。出而用世。又何潔也。烝烝兮能順。皎皎兮弗涅也。斷斷兮知止。凝凝兮有發也。懿哉。

若人名不滅也。考行造文勒此圓碣也。

元封從仕郎江浙等處行中書省左司都事鄭彥貞甫墓銘

嗚呼。大同之世。人不獨親其親。不獨子其子。貨不必藏於己。力惡其不出於身。自大道既隱。情僞日滋。此厄父所以有不及見之嘆。雖然。秉彝天性。亘萬古猶一日。時縱有污隆。而其道則未嘗泯滅。有若浦江鄭氏。非一家之三代。而其七葉之長。彥貞君。非三代之英乎。彥貞諱鉉。彥貞字也。其家自宋南渡。初卽合食爲義門。迄今已歷十世。宋元二朝國史。皆爲立傳。家教修明。有遺範二卷。俾奕世守之。彥貞嗣主其政。益窮躬畏謹。正己以蒞物。或行其所未至。或補其所不足。家人翕然遵化。一堂之上。雅雅雍雍。動逾千百指。愛無不均也。情無不一也。不知孰爲親而孰爲疏也。視其貨泉。則錙銖皆聚於公。且曰。我烏敢私也。察其事功。則羣趨而競赴。又曰。此吾分當然也。爾何與哉。雖甚勞弗懈。義浹仁孚。和氣充牣。四海之廣。莫不聞知。過其門入其庭者。神暢心怡。而鄙吝之萌。銷沮無餘。退而有言。僉謂昔之義居。如樊、楊、張、李之流。誠所不及。而益重彥貞君之善繼先志也。彥貞自幼沈毅端慤。屹然如成人。雖朋舊不敢狎侮。語一近褻。輒白眼望之。聞人有輕己之言。自責自勵。唯恐如其料。及壯。主貨財。倡家意其易惑。百端傾誘之。每正色叱之。使去。倡大詫曰。此鐵心石腸人也。彥貞事父盡孝。父病在枕席。其妻卒。彥貞不敢哭。強顏乾笑。以奉湯藥。竟不使之知。後八日。父亦卒。彥貞哀慟幾絕。水漿不入口者三日。鬚髮爲之盡白。及至終喪。張外舅必慶。憫諸甥笑哭無依。力勸其更娶。彥貞謝曰。鉉見後母肆虐。戕賊骨肉者多矣。忍令吾兒陷之邪。不聽。彥貞

年未四十。君子義之時。天下承平。衣冠萃於燕都。翩然出游。以充其見聞。揭文安公侯斯在禁林。黃文獻公潛居成均。二公以文辭鳴當世。皆折行輩與彥貞交。論文談詩。或至達旦不休。一時士大夫見彥貞方嚴。皆敬憚之。或酣酒放歌。聞履聲卽斂容正坐。不敢吐氣。自時厥後。彥貞仲子泳與從子深同講授。脫脫太師家。彥貞爲書數千言。陳時政之弊。令進於太師。太師多采而行之。彥貞尙風義。舊與參政忽都魯沙游。其子爲武義宰。免官置武林。貧不能自存。彥貞延其家十口來浦江。給衣食三十餘年。鄰瞽者跛者。彥貞憫其顛連。養之終身。每夙興告飢者填門。彥貞積餘飯。親攜簞分餉之。至老不厭。元季兵起。州郡俱釋。大將數統兵入境。服義門名。皆戒士卒毋敢犯樞密判官阿魯灰帥軍五萬。一夕驟至。奪民廬舍以居。二十里之內。雞犬牛羊盡斃。彥貞說之曰。明公非太師之偏裨乎。太師征高郵。尙以無罪去國。況明公之士卒。恣行不道乎。脫有一人言於朝。不識明公將何以處之。阿魯灰愕然曰。業已如此。爲之奈何。彥貞曰。爲明公計者。甚不難。浙東據山阻海。其民頗柔馴。易制。明公誠能撫定而綏輯之。俾他兵不敢東向。執政柄者尙敢以噓咳相驚乎。行且錄明公之功矣。阿魯灰不覺屈膝曰。非公不能聞此言。命左右致束帛爲謝。明日下令啓行。一軍肅然。曾未幾何。國朝大兵取婺州。彥貞攜家避入諸暨流子里。時李曹公文忠統兵來過。嘆曰。此義門也。今世罕見之。躬爲肩鑷而去。事平。遣帳前先鋒率民兵二千護其家歸浦江。人以爲彥貞積善之報云。彥貞年七十。以甲辰之歲四月十四日終於家。其月二十八日。葬於諸暨州桐山鄉宣山之原。家庭內外。不問服之有無。咸嗚嗚哭。哭則盡哀。一縣之中。若宗黨。若嫗連。若三農百工。若鄉士。

大夫皆素冠拜哭。哭亦盡哀。傍邑之賢者聞之。亦竊哀之。曰。是家實無愧於三代。使尼父生於此時。未必不樂道之。今其七世之長亡矣。薰漸之益。吾屬將何望乎。嗚呼。此可以聲音笑貌爲之哉。彥貞之致是者。必有在矣。彥貞之先。自歛遷睦。又自睦來遷。其詳見諸譜圖記。同居初祖諱綺。字宗文。宋乾道中。賜號冲素處士。朝請郎郎中。晏穆爲銘其墓。父文泰。植志不屈人下。設施運量。大能昌其宗。文泰乃青田尉德璋子。出爲伯父德池後。德池之父致。則處士曾孫也。妻張澄。有婦德。敬夫如賓。沒齒無一言相加。遺男子五人。長漢。才優識精。雖不大聲色。弟子莫不畏之。量入爲出。而其致用恒裕如也。次卽泳。通經而有文。累官從仕郎。温州路總管府經歷。得封彥貞。江浙等處行中書省左右司都事。階亦從事郎。次湜。東陽丞。人謂才如長兄。次漢。江浙行省宣使。次濤。庶出也。女子一人。歸東陽蔣嘉亨。男孫十人。楨。械。榘。模。格。棠。米。杲。柯。女孫八人。其二適嘉亨之子昭。及其從子明。其一嫁同邑張宗。餘皆未行。曾孫男八人。燾。耀。炎。樵。熒。煥。光。燄。濂。也不敏。與彥貞有連。而彥貞子若孫。又皆從濂授經。其相知實深。然而遊宦南京。彥貞之歿。殮不得。憑棺。空不得。臨穴。將何以釋其悠悠之思。唯紀載羣行。鑄之樂石。可以垂聲光於不朽。貽矩則於方來。是猶可爲也。於是不敢讓。姑徇漢等之請。而爲之銘。銘曰。

大道之行。天下爲公。風氣敦龐。臻於太康。異體同心。情無不通。此謂醇熙。三代之英。世遷俗殊。道德淪喪。紛臂借擾。秦法之涼。肝膈充窒。形骸閉藏。愷我寤嘆。涕泗沾裳。彼美鄭君。沈毅自強。上承奕葉。合族共煬。內教云飭。外政復囊。規重矩疊。遙有耿光。曷以致茲。日率其常。或斂而舒。或翕而張。有子將將。有婦洋洋。

無間戚疏萃於一堂孰爲尊卑誰爲父兄至和不冒奚有眇封僮涉其庭煦如春陽決人肌髓薰爲善良人亦有言此爲世坊非君之賢莫襲其芳襲之斯何旣明且剛以仁爲食以義爲漿豈能使昭枯堪再榮百鳥喧啾忽見鳳凰宜覽德輝西東翱翔豈意鑿翻竟歸冥茫載者亡車渡者失航瞻望弗及盡然感傷仙華叩叩浦汭湯湯緬懷德人何日而忘

故朝列大夫浙江行省左右司都事蘇公墓銘

洪武十一年四月二十五日元朝列大夫浙江等處行中書省左右司都事蘇公卒郡之壽俊與旁州之賢凡知公者無不潛然流涕然公以政事聞於時高年至八十三而終五男子嘗與仕版七孫亦嶄然見頽角皆可以無憾顧乃哀之弗置者誠以一時遺老日就凋謝而公又云亡古今文獻將何從而徵之邪其子祖允等以其年某月日葬公於某山之阡乃命弟伯衡踏門請製墓上之銘濂公之里中子其哀公尤切於他人固不宜以不文爲辭初公之生也不聞啼聲視之唯紫胞在地而臍帶綵絡之乳媪撥開兒始啼識者已知爲祥徵及長學經於許文懿公以才推擇充府史尋入閩海憲府爲奏差憲使以廉直爲同官所忌嗾御史劾之章未下卽命奪使印公毅然持不可使亦擡拾同官之過欲訟繫之公諍曰兩虎共鬪其勢不俱生明公奈何類之已而皆止汀寇謀襲臨漳公往督長吏爲備長吏欲藉民爲兵公曰民不知兵久矣一旦藉之必大致紛紜此非禦盜是增盜也長吏曰計將焉出公曰吾知所處矣閱兵籍得放逸者二千使帥之擊賊竟獲其首禍者廣東部使者聞公賢稽其年勞辟爲書吏南海番禺二縣輸恆

賦之外復有所徵。號稅外錢以給上官燕私之須。小民怨謔盈道路。公聞白罷之。朝廷每頒新鈔。諸郡部使者必監焚舊鈔。此故事也。時使者與廣州守有隙。恚不往。司鈔吏積十五年不得調。公復白而焚之。俄再入閩。補令史於宣慰司。聲稱籍籍。行宣政院延公爲掾。久之。趙郡蘇君天爵來參江浙省政。極才公。復挽之入省。公遜與舒常。弗之從。蘇君遂兩用之。公以蘇君知己。遇事失當。輒諍。凜然有峭直風。蘇君敬憚。視之異他掾。海漕之糧。歲不下三百萬。漕官多強取贏。無錫州獨不與。乃誣其糧惡。不宜上供。省臣怒。欲加罪。公命覆核之事。獲免。海盜起。省發官粟募民舟。載軍捕之。舟未盡發。而盜請降。省逮民歸粟。公曰。言猶在耳。惡可背之。況民得粟。必已食之。既今將焉徵。卽徵。唯徵未發者可爾。省臣從其言。斬州紅巾。搆亂陷於潛。昌化犯杭州。省臣皆遁。參政樊君執敬獨坐堂上。以死自誓。公說樊君曰。明公以身死國。義則得矣。如一城生聚。何。今城中健兒不下數十萬。公庫金帛以萬計。與其委諸盜賊。曷若募民使戰。邪。戰而不勝。就死何晚也。樊君不能從。上馬迎戰而死。公與掾李樞謀。以蘇李署號召民殺賊。殺一人。卽攜首受錢二百五十緡。民持刀爭奮。數日之間。獻馘者充庭。未幾。辨章教化。君復杭州。公絕口不言功。考滿謁選銓。曹中書參議汝中柏聞公名家子。欲引爲右曹掾。公察其威權太橫。力辭南還。擢紹興路蕭山縣尹。蕭山民詭名匿其田賦。科繇不能均。一公令其自實田。輯爲冊書。凡有徵發。皆視書重輕之。兵興以來。縣糧輸衢處二州。民憚遠征。往往皆屬吏。吏並緣爲姦利。糧不時集。主運者妻孥恆坐繫。公釋之而罪吏。期月成足。且爲立法。每鄉置督運一人。趣民各以糧赴江濱。仍驗糧寡多。賦錢僦舟以行。民大便之。縣爲吳越要

衝師旅。經從無虛月。誅索芻芘。少不愜。則侵掠居民。民畏之甚於鬼。公儲峙既豐。有犯者擒實於法。士卒入城。如見大將。不敢出語。相誰何。會歲儉。弛湘湖之禁。以利民不足。啓常平倉。以活餓者。僚屬力沮之。公大言曰。發天子粟。活天子民。有何不可。儻有譴責。吾自任之。民賴以生者。以數萬計。帥闔以元日至。檄縣市殺核諸物。公發視。甚執筆書檄。尾曰。四郊多壘。正臣子痛心疾首之時。奈何襲太平故態。飲酒爲樂。邪。聞者愧服。府公諱公之爲。有難決之獄。移公訊之。諸暨知州袁元以散者年帛不明。將搆以賊墨。公推其情。乃吏與里胥爲濫。元但不躬給爾。公各坐以其罪。元致白金爲壽。公曰。吾知執法爾。豈私爾邪。卒卻之。歲餘。改本路總管府經歷。不上。階自承事郎。轉文林郎。行樞密院照磨。僞吳張士誠據姑蘇。既降。公持詔書往湖州。責其戍將潘允明。行郊迎禮。禮成。允明欲西向坐。公正色曰。以爵則我幕僚。雖相向坐。亦以爲過。然我所持者詔書。君敢與詔使抗禮邪。挾胡床中席而坐。允明懼服。臨發。贖米百斛。錦二十端。公笑辭曰。君謂使者而可以貨取耶。時士誠新授淮南平章政事。開省蘇州。士誠聞之。請於康里丞相曰。詔使四出。唯蘇照磨廉介士。願得爲幕屬。君恥之不往。復超今官。參政石抹君宜孫分省於處。請公與青田劉君基從。石抹君方以討賊自任。浙東倚之爲重。每事必謀於公。公勸其禮賢下士。安輯流亡。招徠羣盜。撫之以恩。石抹君始從之。衆心翕然歸。後好自用。幕下士多散去。部將胡君深。章君溢。亦擁兵觀望。公獨左右之不變。復移書胡君等。憐憐以共濟國事爲戒。石抹君多用故人攝縣。棄行省承制所用者。公曰。今朝廷不通。事當一出行省。奈何違之。石抹君愧謝。越部書佐李伏喜誇誕。石抹君賢之。薦授員外郎。位居

公上數狎侮公。人爲之不平。公不與校。既而伏以反覆受賂。覺石抹君械繫之。公解之曰。參政始薦之。今乃囚之。古之以禮進退人者。其亦如是邪。伏因得引去。經略使李君國鳳循行至處。久留不去。以十羊授公。公曰。某以非才爲省屬。天使命之牧羊。固當然。大敵壓境。天使能出奇計殲之。雖日烹百羊。何害。否則。某亦不保首領。欲久爲天使牧羊得乎。李君默然。元季處多盜。征行吏多受盜金。旣降而復叛。公秋毫無所犯。大溪吳誠七成擒。官簿錄其家。得帳籍驗之。幕府官無不受賂者。獨無公名。已而浙水東諸郡悉入皇明版圖。而七閩猶未附。怨家告公長子仕閩。宜謫徙滁陽。公就從無難色。丞相李韓公憫公無辜。欲奏而官之者再。公以年毫力辭。遂歸臥金華某山中。左圖右史。超然自得。越十二春秋。乃終。未終一日。精神如常時。忽不晡食。越翼日。瞑目端坐。至夜。諸子進問所欲。公曰。靜以俟命。無所欲也。漏下四鼓。撼之則逝矣。是夜大風雨。居民見士馬雜遝。前籠絳紗燈。訶叱東去。良叩後來者云。接蘇伯夔。君子以爲異。公性敦恪。尙風義。孳孳務行及物之政。唯恐有受其害者。至於修水利。興學校。皆具有成績。然識量堅凝。不爲威武所遷。嘗從大司農受海盜降。分比其衆。寇不悅。嘯其部曲。大譟轅門下。衆皆相顧失色。公獨進曰。天子以爾等本良民。迫於不得已爲盜。故遣使者諭爾降。爾果欲反。不畏十萬橫磨劍邪。俱逡巡而退。復從樊君督海漕事。用牲牢祠天妃廟。始降神。寇舟突而入。陪祀官解散。公謂樊君曰。事不可中輟。成禮而退。神色自若。與人交。緩急可倚藉。部使者有託其妻子者。使者亡。公禮之益厚。避兵登舟。逢故人兄弟。傍徨走水濱。亟呼與共載。行數里所。又見婦女羣泣。亦其友母妻也。命舟師迎之。或止公曰。舟重不能前。追兵

且及。追恤他人邪。公曰。死生有命。吾不忍獨濟也。公之善行。如此類者甚夥。姑取其著者書之。餘不盡載。公諱友龍。伯夔字也。人稱之曰栗齋。而不敢字。其先居眉州眉山縣。文定公轍之長子。宋吏部侍郎徽猷。開待制。贈少傅。遲來知婺州。因家金華。歿。塋蘭溪之紫巖鄉。遂爲金華人。少傅生龍圖閣直學士廣南東路經略使贈少保簡。少保生江東提刑祕閣修撰大理卿諤。大理生吏部郎中江西提刑林。吏部生朝奉大夫顯謨閣待制知貴州熙。貴州生通直郎兩淮轉運司幹辦公事圭。運幹生從政郎淮安縣主簿鎮。淮安君娶潘氏。無子。以三從弟太學生鎬之次子爲後。卽公是也。上距文定公蓋九世矣。公娶宗氏。忠簡公澤七世孫。柔順惠嘉。爲一鄉婦儀。子男子六人。四仕於元。一仕皇朝。一蚤卒。祖允。將仕佐郎浦城縣主簿。師道。廣東宣慰使司奏差。繼兄肖德後。伯衡。前鄉貢進士。今自國子正擢翰林國史院編修官。文辭雄麗。較之小坡斜川集。有過無不及焉。思誠天。止善。東陽縣尉。崇德。將仕郎行樞密院管勾。子女子三人。長適俞坦道。餘皆夭。孫男七人。恆。悟。悅。恢。愷。忭。忻。孫女五人。歸曹源。宗涵。徐道。餘在室。嗚呼。蘇氏之世。非惟以文學忠孝著稱。而爲政及物之美。亦代不乏人。有若少傅奏減吾婺市羅之額二萬八千有奇。民爲立祠。少保歷典大郡。所至以遺愛見思。而大理之樹善剗姦。吏部之忠厚敦俗。奕葉之間。簪笏相映。公又起而繼之。聲名烜赫。亦丕昭於前烈。何其一姓之皆賢哉。嗚呼。自奮於榮名者。易爲力。而能繼先緒於弗墜者。難爲謀。非天欲報功。俾之世濟其美。吾知未必能爾也。嗚呼。是則然矣。婺之蘇氏。其積累深長。實自少傅始。後人因引而伸之。公之仁民之功。可謂侈矣。其子若孫。烏有不振拔者乎。當知後之視公者。亦猶今之

視少傅也。夫何疑哉。伯衡與濂有文字之雅。故竭蹶來山中請文。遂歷序其事而歸之。銘曰。
眉山蘇氏稱三文。光芒萬丈爛乾坤。少傅守婺政以仁。紫巖生氣凜然存。珠明玉潤多後昆。簪紱續紛綯。
朝暎。貴而尸位玉之珉。能守家法斯足珍。維公挺生嘉兆甄。鳴岐彩鳳瑞世麟。從事大府歷粵閩。其職雖
卑氣益振。峭直猶如古諍臣。得失利害輒屢陳。聞民有病眉則顰。浙垣招充幕中賓。孰知斬寇紅爲巾。嘯
聚山澤動作屯。犯我屬部窺大藩。用姓給號令編民。殺賊如殺狐兔羣。有功默默不自言。大官受絳東海
濱。忽爾跳踉欲舞。一叱鼠伏不敢噴。身佩縣章魚懸銀。照嫗扞禦一以恩。設心不讓漢吏循。拔彼水火
脫溺焚。錯之華棧藉錦茵。參贊宥密待咨詢。手持璽書諭闇昏。中坐以示王人尊。噉我以利耳不聞。枯氓
搆亂奔狂瀾。障遏勿使成瀾漫。海桑既變光嶽新。搆書歸臥邱壑雲。執節不仕爲全人。庶幾不負名家孫。
春秋之高踰八旬。儵焉觀化只遽巡。大風挾雨來掀翻。士馬雜遝向東奔。絳紗籠燈光吐吞。騎卒前呵肅
靈氛。生爲良臣死明神。丈夫如斯世罕倫。白石可磨媿瑤琨。史濂造銘焯墓門。石縱可泐名弗諼。

故韶州路儒學教授曾府君墓銘

府君諱順。字至順。姓曾氏。邨國公四十九代孫。邨國家於魯。十四傳至都鄉侯據。始避新室之亂。徙豫章。
子孫日盛。大江之南。言曾氏者皆宗焉。又六傳至略。遷於臨川。又十二傳至唐沂州刺史可徒。生司空洪
立。司空生散騎常侍延鐸。常侍又遷於南豐。生四子。長曰仁暉。生志及文照。南唐時。又同遷臨江新塗縣
之吉陽里。文照舉童子科。生乾度。宋淳化三年進士。仕至太常少卿。贈刑部尙書。志生易用。易用生侃。侃

生高安丞斧擢元祐六年進士第。又遷縣之高流里屏山之下。生用先用先生嶽嶽生愿正愿正生翊翊生汝舟。汝舟生兼善。能傳黃文肅公幹之學。爲時名儒。生軍器監簿天麒。天麒倜儻有大志。常居文信公天祥幕府。又從賈丞相餘慶等奉使於元。竟全節而歸。則府君之父也。府君性警敏。自幼輒有聞。時信公之弟文惠公璧來爲郡。招府君與其子文莊侯陞共學。陞旣秀穎。府君能與之競爽。其師胡君端一亟目之爲二俊。當宋初改物。遺黎故老猶有存者。監簿君日開尊共飲。劇談先代文獻。府君從旁聽之。有疑則問。唯恐其不傾盡。諸老爲之嘖嘖愛賞。元至正中。程文憲公鉅夫奉詔求賢江南。欲薦府君。才可用。監簿君止之。曾未幾。何部使者趙君孟迎以茂才舉。署饒州路儒學錄。改袁州。陞南雄州儒學正。士皆服其化。而爲率德勵行之歸。會科目詔行。府君欣然應書。不利。退而歎曰。吾能損所學以徇時好哉。因不復踐場屋。鄉友范文白公棹清修之士也。極慎許與。憫府君官不充其才。會御史銓選廣中。力薦之。於是板授韶州路儒學教授。未及上。吏部已別選。遂止。賢公卿多稔府君行。欲強起之。府君辭已。而長子受辟爲校官。季子以春秋舉於鄉。取第五名。文解。府君喜曰。吾何以仕爲。乃陶然自放。清泉白石間。與高人逸士相游。樂。府君被服儼雅。揮麈談笑。傲然如霞外。人世間塵土。不可得而侵也。善鑒定古器物暨法書名畫。每傳玩以爲適。或取琴鼓一再行。焚香默坐。超然與造物者游。一旦遘疾。預告終期。召婚友入榻前。與之言別。意甚懇懇。介婦方歸寧。命趨之。還旣至。正衣冠起坐。撫幼孫頂曰。吾遲汝久矣。復東首而臥。備然而逝。實至正七年春三月某甲子也。壽七十有五。斂之日。風雨晦冥。室廬之後。大木俱拔。君子異之。九年春正月。

壬寅奉柩葬於屏山麓。堪輿家謂不利。以某年月日改葬同里夏方之原。府君孝友天至。監簿君得病疾甚劇。府君泣禱上下神祇。夜夢三士告之曰。服二附湯當瘳。已而果然。歷十餘年方沒。監簿君沒。大母陳夫人年垂九十。府君懼夫人之哀。夙夜祇奉。唯恐少拂其意。夫人安之曰。吾子雖亡。不沒矣。季弟甫齏。出爲伯氏後。仲姊生四子而夫亡。子絕幼。茫不知所爲計。從父兄孤子凡三。俛俛無所依。府君皆鞠養教訓之。使至成立。且歸其產所入毫毛不以私。其與人交。一裁之以義。郡守李章肅公。偶聞府君爲佳士。禮下之。李公後以誣免官。其門可羅雀。府君事之益勤。別駕高翔。其知府君不下於李公。及改守浮梁。欲一見府君。走書速之。府君卽日命駕。旣相見。勞苦甚勤。未幾徑上馬出城去。翔聞之大驚。追錢十數里。且曰。公能遠來。何遽往如是邪。府君曰。旣見君子。不還將焉求。翔歎息而去。性尤仁慈。振貧卹匱。每不遺餘力。臨川姜肅。長沙譚志仁。盱江王旭。皆顛沛流離。數瀕於危亡。府君能振之。是三人者。德之謂殺身亦不能報云。府君容貌魁梧。須髯如戟。爲文辭不務鉤章棘句。而壹以理勝。當是時。若吳文正公澄。虞文靖公集。皆海內師表。每稱府君之賢不少。置則府君信賢矣。初監簿君著史學統紀一卷。未及成而沒。府君補完之。府君所著詩文若干卷。因自號唯庭。遂以名藁。吳公爲序作者之意。今藏於家。府君娶義門劉氏。克盡婦道。前三十一年卒。子男子三人。長曰紹唯。平陽州儒學教授。次曰斯季。曰魯。承事郎祠部主事。博極羣書。而文辭龐蔚。學者師之。子女子一人。分宜縣儒學教諭。聶景堂其壻也。孫男七人。曰壘。曰基。曰壑。曰均。曰埴。曰塾。曰圭。女六人。長歸某。餘未行。曾孫男六人。曰某。曰某。曰某。曰某。曰某。曰某。女四人。在幼。嗚呼。聖賢

之裔。自北而南者。若孔氏之於衢。顏氏之於蘇。於閩。曾氏之於豫章。皆多子孫。而曾氏爲尤盛。紆朱拖紫。以顯融於時。在在而是。常侍五傳。至文定公鞏。兄弟者出。遂以辭草名天下。何曾氏之多賢邪。府君之先。蓋與文定公同出於常侍。奕世以詩書亢其宗。府君雖不獲大用。屢司教鐸。蔚爲經師。達賢大官。亟稱交薦。可謂無負於家學者矣。府君之葬。翰林待制杜公本。國子司業曾君堅。既爲前後撰銘。刻諸幽室。而魯嘗與濂同修元史。寅緣交誼。復來求隧上之文。濂聞較德焯勤。在古者不厭其詳。故爲表其行而益之以銘。銘曰。

邨國傳道自孔門。遺澤滂濊苗裔蕃。有如大江從西奔。支流雖千會一原。重珪疊組光燉燉。著勳昭德裕後昆。夫君繼之如玉溫。嶄然頭角譽彌敦。目爲二俊起續緜。三爲人師教道尊。書詩俎豆習禮文。鄒魯其俗澆爲淳。自內而外本則存。大木斯拔風霆掀。人琴俱亡海氣昏。學子攬涕爲招魂。刻文墓石揚清芬。

葉仲貞墓銘代柳待制作

桐廬李驥龍嘗與武林葉禎交。禎年三十時。從父某來桐廬爲釣臺山長。山長君死。禎貧不能歸。驥龍爲合錢予之。使賣藥市中。以自給。禎風神蕭爽。不能隨世沈浮。每遇月白風清。輒同驥龍賣舟泛桐江而下。驥龍善洞簫。禎歌古辭扣舷而和之。或至忘返。蓋飄飄然游於物外者垂二十年。而不知老之將至也。禎一日病革。憂戚莫知所爲。驥龍顧禎曰。君非念後事乎。有驥龍在。君何憂。禎喜。力疾起拜曰。此膝未嘗下人。今不覺爲君屈也。竟不能食三日死。驥龍爲具棺斂。買地葬焉。後一年。驥龍亦卒。驥龍之從弟懋。哀禎

不娶而無子。復合禎之所遺財。市田二畝。有奇。入華林僧院。俾立主。以奉禎。初禎善爲學。不治章句。頗喜以詩自鳴。翰林學士貫公甚器重之。稍長。習吏於浙西憲府。部使者欲辟爲屬。不就。天歷中有詔。粉黃金爲泥。書大藏經。禎以善書應募。法當得儒學官。亦不就。蓋禎氣岸多豪。一言不合。輒徑去。故卒無所成名。禎字仲貞。武林人。無他族屬。其世系禎未嘗言。今皆不可知。享年五十有四。以重紀至元五年五月二十六日卒。明年三月三日。葬於玉塢山原。去驪龍之墓。不二百步。葬後四月。懋復爲伐石來請銘。昔粵謝翱以善詩來游吳越間。吾鄉岩南先生方公鳳實與之交。歿死無所歸。公爲率一二友生。葬翱於釣臺傍。且刻碑志之。其事與驪龍兄弟正相類。豈聞公之風而興起者耶。非耶。先聖人嘗有言曰。死於我乎。殯。驪龍兄弟蓋近之矣。是宜銘之。以詔後之人。銘曰。

吁嗟葉生。胡不恤汝家。吁嗟葉生。胡不就汝實。而斂汝華。使千載之祀。一朝而墜。豈汝之不自力。抑命爾耶。幸有仁人。既殯且葬。汝已歸骨於此矣。予尙何嗟。

吳子善墓銘

濂之友吳中子善。世家婺之東陽。自曾祖某。祖某。父某。咸爲儒。至子善。益務讀書。從里之大儒陳樵先生游。初濂謁先生太霞洞中。先生曳杖微笑出迎。坐濂於海紅花下。俄呼酒酌濂。先生自歌古詩。奮袖起舞。子善侍先生側。目濂引滿。以成先生之樂。濂自是得與子善交。後三年。再謁先生。復見子善。時先生年耄重聽。或有所問。子善從旁書濂言以對。及濂辭先生還。子善送至山高水長處。坐石共語。依依弗忍去。自

時厥後。久不見子善。聞子善獨奉母某氏居陋巷間。雖無儻石之儲。曾不少戚戚動於中。每遇明月之夕。輒鼓琴以自娛。琴已。復把筆咏詩弗輟。濂竊悲之。人往往窮則失守。有若子善之爲。造物者必能昌之。今年秋。復求子善而謁焉。則子善之死已三年矣。嗚呼。天者豈易知耶。子善之固窮如是。乃復使之早夭。是果何理耶。嗚呼。悲夫。子善通周易諸家說。屢就試有司。不中。家益貧。年過三十。不能娶。有一妾。爲生二子。長某五歲。幼某三歲。子善母死未幾。而子善又死。二子蓋惇然可念。子善之友張良金、章編、蔣偉器率諸好義者。既買棺以斂子善。復用羨財贖其諸孤。子善得年四十。生於皇慶壬子某月日。卒於至正辛卯某月日。以某月日同母葬於縣南二里姜原。蓋潘塗所指地也。葬一年。偉器來謂濂曰。子與子善頗交久。盍爲銘。嗚呼。濂尙忍銘吾子善邪。昔孟郊歿。貧無以葬。其友樊宗師爲告諸嘗與往來者。經營喪事。且以餘資給其遺孀。昌黎韓文公與交遊甚洽。實爲銘其墓。今觀子善之事。固不能盡同。其交友之所盡心者。則蔑古今之異也。濂雖無昌黎之文。又可無一言慰子善於地下耶。嗚呼。悲夫。銘曰。

孰使子材。孰使子窮。又孰使子年之不豐。彼蒼者天。曷其夢夢。一氣倅榮。或繫其逢。我作銘詩。以弔其凶。以哀其終。以揭其封。

鄭仲涵墓銘

嗚呼。自道廢民散之後。世之爲師弟子者。朝離青帷。夕若秦肥之視越瘠。比比而是。有如仲涵之於子義。則師友情如父子也。仲涵之死。子寧得不哀乎。仲涵初年學舉子業。把筆爲文。春葩滿林。色澤明鮮。而生

意津津敷暢。予意仲涵必先登。再踐場屋。皆不合。有司繩尺。仲涵嘆曰。吾惡用是爲哉。乃棄去。益潛心秦漢。以來諸文章。大家無所不窺。亦無所不辨。畜之既深。發之亦盛。商敦周彝。藉以五采。五就陳列。天祿石渠。間人見之者。雙目輒運眩。仲涵復歎曰。吾惡用是爲哉。又棄去。取羣聖人之經。而燭溫之。窮其道德性命之祕。質於濂洛關閩之說。久之充然。如有所得。仲涵復嘆曰。車成矣。輪轅美矣。不行。何以涉於遠道乎。益思明體。而適諸用。母夫人病逾年。仲涵保抱扶持。終日不離側。夜則泣禱於天。請以身代。忽瞥患惡疽。不能坐。跪煉藥劑以進。膝爲生胼。夫人病革。思食西域瓜。旣食而卒。仲涵見瓜。終身弗忍食。因懸懸念母。不置。氣鬱結弗舒。遂得贖疾。迨居父喪。拊膺悲號。絕而再蘇者數四。杖而後起。服雖闋。凡遇諱辰。卻酒肉。弗御者七日。至期。哭奠如初喪。癸卯之夏。諸暨戍將謝再興。以城叛。浦陽與諸暨鄰壤。訛言寇且至。羣從兄弟皆避地東陽。或移金華。是年冬。寇壓東陽。囊橐皆無遺。仲涵時在金華。聞之。泣盡。持所服衣衾。往分之。雖身罹寒沍。不卹也。從弟澧與妻蚤夭。三女僕。儼然無依。仲涵鞠育盡道。各選名冑而配。供張之豐。逾於己女。仲涵家義居十世。族屬頗衆。或有疾。不擇疏戚。夜必四三起視。遇有死喪急難。不顧利害。身任之。至於周旋事爲之間。條理粲然。必期於集。且不與人較曲直。或以非理相讓。但俯首默受而已。其在內之行如此。達之於其外者。尤夥也。斬春王烈家燬於紅巾。帥其族五十。乞食浙河之右。仲涵館之數月。而後去。同縣騷人。貧不能養母。來懇於仲涵。仲涵曰。吾何無母可養邪。厚周之。仲涵負笈從師。道遇十餘人。襁負其子。且行且泣。試叩焉。則山水暴溢。室廬漂沒。欲求給縣大夫。不食者日。再周矣。仲涵亟傾篋中錢與。

之村氓王氏患多男子。仲涵至其家，聞兒啼聲甚悲，蓋氓將溺之於水。仲涵爲陳父子至情，且惠以粟，氓大感悟，生之，並舍三里所。溪流湍悍，遇雨則人跡絕。仲涵造舟渡之，金華洞溪，其悍爲尤甚。舊有石梁，久壞而弗葺。仲涵捐白金八百一十八銖爲倡，衆翕然而和，未幾而梁成。當夏五六月，赤日流金，道多病渴者。仲涵設湯茗濟之。冬大雪，仲涵晨出，見寒士衣不掩脛，齒相擊下上。仲涵呼酒飲之，爇火溫之，乃解白衣纊裘爲贈。又嘗禱於廟，寡嫗困臥廟門無衣，愈於寒士。仲涵與妻周嚮謀，製衣一襲與之。凡納交仲涵者，無不曰：此古仁人也。或又曰：其內外行如一者哉。仲涵自試藝不中，遂不復有仕進意。有薦爲月泉書院山長者，仲涵辭不就。及入國朝，會求賢之詔下，郡府絡繹致請。仲涵輒以耳聾爲辭，已而部使者趙君壽奉旨蒐材浙水東，以薦紳交譽，力迫仲涵就道。仲涵冠帶謁君，辭意悃款。君察其誠也，不敢強。仲涵稟賦孱弱，雖矍然若不勝衣，而其精神緊峭，矩度峻整，人莫不親而愛之。其於倫品之間，驩然相聚，睦然相俾，有如春氣流浹，不知泰和之襲人也。性雖好施與，絲毫事必吝，稟於長者，不敢私。奔走兵燹中，人見其袖二書以行，頃刻弗少離。及事平還家，取而視之，乃宗譜家範也。仲涵所著書，有遂初齋稿十卷，續文類五十卷，藏於家。嗚呼！仲涵之死，予安得不哀乎！初予讀書浦陽山中，仲涵卽從余游。先後十有餘年，予初無益於仲涵，而仲涵之相助余者恒多。時予執經山長吳公，侍講柳公，侍講黃公之門。仲涵每侍予往拜，三公見其文，亦以遠大期之。自時厥後，人事不齊，不聚首者數載。及予赴召，總修元史，與仲涵約曰：子非青年矣，予春秋亦漸高，行當俟汰而歸，與子婆娑一邱一壑間。聖賢心學之祕，尙相與窮之。史事雖畢，復

待罪禁林。留南京者四年。仲涵忽不遠千里來見。且申前言。予諾之而未及踐。豈意仲涵先予而逝乎。仲涵之子楷。自爲狀來求冢上之銘。其詞纏綿悲愴。尤足以動予之哀思。每一讀之。淚潛然下。所以久而不能成文。雖然。予於仲涵。忍不投淚而言乎。昔者徐仲車以孝行著稱。惜以龔廢而仕不大顯。君子以節孝諡之。今仲涵之事。無媿仲車者也。宜私諡以眞孝處士。勒石墓門。而埋予文墓中。庶幾少慰仲涵於九泉之下乎。仲涵姓鄭氏。淵其名也。其先世遷徙之詳。見譜圖記。曾祖德璋。宋青田尉。祖文轟。父鉅。母周氏。配室卽周寯。生一子楷也。以文學稱。女二。一適呂堂。一未行。孫一燿。生於元泰定丙寅九月十三日。卒於今洪武癸丑正月十一日。壽四十八。以其年某月日葬某山之原。禮也。銘曰。

質珪璋兮絺繡文。旣姁麗兮又栗溫。宜參雅樂兮獻明庭。胡淪巖穴兮鏟其英。匪進則退兮道之常。保家肥兮譽彌章。民同胞兮勢弗殊。使我心惻兮軫寒與饑。少微煌煌兮雲掩之。陰雲英英兮又不能霖。前何古兮後何今。想美人兮涕泗沾襟。

東陽貞節處士蔣府君墓銘

府君諱玄。字子晦。別字若晦。姓蔣氏。初周公庶子伯齡受封於蔣。子孫氏其國。在漢居杜陵者最著。兗州刺史詡尤有名。詡四世孫山亭鄉侯澄。徙居義興之陽羨。澄七世孫樞。仕晉爲吳郡太守。復南徙台之仙居。唐末五季之亂。樞裔孫助避地婺之東陽。仕吳越錢氏爲金紫光祿大夫。檢校司空兼御史大夫。遂家焉。府君蓋其後也。曾祖諱天廩。宋紹定中入粟佐邊。授迪功郎。祖諱沐。元南康路建昌縣主簿。父諱吉相。

少儼儻負氣。嘗事仁宗於東宮。擢典用監知事。出爲襄陽路穀城縣尉。以卒。府君生於燕都。兒時嶷嶷。聳聳。不妄狎笑。八齡就師讀書。終日據案端坐。未嘗索願。其師奇之。使察諸生怠肆者。諸生畏憚斂戢。莫敢譁。年十六。侍穀城之官。杜門絕賓客不交。晝夜攻學。母夫人閱其勞。節膏油不多與。俟母寢。以衣衾蔽牖。而誦。夜參半乃已。穀城蒞官剛嚴。府君因事進諫。多所匡補。出遇其吏民。恂恂退抑。人不知其爲尉子也。旣冠而歸。時許文懿公謙以道德爲學者師。府君從而受其說。識悟過人。辨析精確。內涵外飭。日超月異。先輩皆自謂不及。然府君務見躬行。以禮齊其家。奉先祠。謁拜祀奠。取朱子所修儀文行之。歲時率族人祭。始遷祖墓。祭畢。序長幼列坐。告之親睦之道。屬之近者。朔望必會。貧者歲周以兩月之粟。修建昌所創義塾。延師儒教其子姓。至於鄉人。每歲冬至。殺牲置酒。會長老俊人行鄉飲禮。府君爲之講說嘉謨。偉行使聽之。曰。爲父兄弟當如是。鄉民莫不化服。細民窶者貸以粟。不取其贏。待以炊者常數十家。東陽多宋貴臣族。民藝其田者。旣入粟半。復畝徵其絲。民頗苦之。府君倡其鄉人曰。君子以養野人。奈何厲之。遂罷不徵。人用是德府君。稱其善不虛口。遇事無大小皆立決。不形於謀議。所爲輒出人意料。初延祐中。惡少結邏卒。誣平民爲僞鈔。破其家。意府君儒生可侮。以語撼之。冀得賂乃止。府君怒。走白大府。逮惡少。寘於法。害遂絕。由是宿豪文吏搖手相戒。不敢過其門。府君益刻苦爲條法。使後嗣可守。室廬械器皆預爲數世計。各極其精善。人服其才。而惜其不獲施於世也。府君饒於財產。脫去華靡習。聚書萬卷。致力其中。著四書箋惑。大學章句纂要。四書述義。通若干卷。治平首策二卷。學則二十卷。韻原六十卷。府君德士習。

淪於夷俗。獨製古冠衣服之。揖讓步趨。必以禮法。人望之。神情夷朗如逸民高士。及卽之。則雍然和。與之語。出仁入義。愈久而愈無窮。年四十有七。以至正四年六月辛酉。終於家。學者私謚貞節先生。十二月壬申。葬縣南乘驄鄉御史里馬塢之原。娶葛氏。宋參知政事端獻公洪之玄孫。子男四人。大同。興宗。嘉亨。允升。女四人。適萬實。李觀。及東陽儒學教諭李思文。其一蚤卒。孫男十人。昭。暉。旭。擘。昇。昱。昇。景。杲。孫女二人。適許益亨。鄭格。曾孫男五人。鈞。鑾。鏞。鎮。某。女三人。允升嘗從黃文獻公潛遊。有文用薦者。授慶元路儒學正。早死。而二次子亦繼卒。獨大同存。善承其家學。以故國子祭酒許元狀來請銘。余未壯時。嘗拜府君於家。炙其言語儀貌。儼然成德人也。蓋今四十年。而余亦老矣。銘烏敢辭。銘曰。

柏之丸丸。或朽于山。堂之巖巖。或病於顛。天產其良。不需其完。人愷以咨。我恬以安。探聖之源。揚道之瀾。不諧一時。千載之傳。

鄭檝墓銘

浦陽鄭檝。少凝慤寡言。能暗誦易詩書論語孟子。稍出爲詩歌。可觀。先生長者能之。爲加布其首。字曰叔通。年二十。至正丁酉三月辛巳。以病熱亡。四月癸酉。葬仁義里三角山。其父濂哭之慟。來謂予曰。檝也。幸從先生游。先生謂爲可教。竊意其能亢吾宗。今不幸死矣。先生儻不死之。盍爲銘。予聞亦哀不自勝。爲著銘曰。

父母生子。孰不欲望其成。矧如檝之秀穎者乎。今未出弱齡。而遽實魄泉下。可悲也哉。可感也哉。

唐思誠墓銘

嗚呼。吾思誠其死矣乎。吾竊稱東南文獻之邦。十數年來。故材已實。而新秀未茁。所以承前而引後者。當有其人。而思誠其可死矣乎。嗚呼。初濂年十九時。來書游城南。識思誠於玄暢樓上。思誠長濂僅三歲。濂見其斂容端坐。辨嚴光。陶潛優劣。歷舉傳中語。而以義裁之。袞袞五千餘言。濂雖慕之。意思誠或致力於斯。故知之爲獨詳。他固不能皆然也。自是以來。日與思誠親。當風氣曠。晷賓客滿坐。或觸其談鋒。而思誠岸幘傾吐。愈詰難。愈見不可窮。有來求詩若文者。肆筆而成。不事塗竄。如春雨方滋。宿蘄雜芳。不擇地而發。思誠未始有自矜意。且曰。文以達吾言。何以工爲。濂益慕之。然猶謂思誠信奇士。世之敏洽者。將能之。而未知其充積於己者。果何如也。後五年。濂從涇潁吳公遊。越而思誠以廉訪副使。暢公之聘。講授淮陰。思誠搜剔經髓。意融而言隨之。聞者爭聽。戶外之屢常滿。一時寓卿若辨章左公。翰林承旨張公。參知政事韓公。皆忘其勢。與思誠交。聲華張甚。及思誠自淮陰還。會濂客錢唐上。思誠竭蹶來訪。濂欣甚。出醇酎。與思誠飲。燕火夜宿。相與辨諸子是非。凡九十種。餘及僻隱緯候之書。又數十家。濂時血氣未衰。尙能記憶。思誠各歷舉疑以問。濂頗歷誦其文。而對思誠抵掌於几。曰。君之精博。一至此乎。吾每見君言。訥然不能出諸口。又何善自閔藏。而文采不露乎。吾之彊記。不下於君。第恨無書可誦。陳氏書錄之所記者。吾唯能了其三之二耳。濂聞思誠言。遂以所疑者反質於思誠。思誠答之如撞巨鐘。隨叩隨應。嗚呼。自科舉之習行。爲士者趨辨目前。一遇有問。舌柱齟不得發。孰有髣髴如思誠者乎。而思誠方恥以自名。又曰。吾學

不徒博徒博陸澄之書廚爾。吾則藉之以窮理而施諸事也。濂極慕之。始知思誠之學。期明體以達用。而非獵襲以給談辨者也。後十年。濂既歸隱小龍門山。飲水著書。以樂先王之道。不復與世接。而思誠用部使者之薦。擢金華縣教諭。丁外艱不赴。再遷衢州路學錄。亦未及上。忽創發下體。大熱如蒸。焚已而增劇。遂卒。時至正丁酉八月十七日也。濂方避兵句無山南。思誠之沒不及知。暨知之。而思誠之骨已入土久矣。濂奔走西東。弗能絮酒一酌墓下。思誠之弟懷敬。奉門人徐莘狀以墓銘爲請。嗚呼。濂其尙忍銘思誠乎。思誠幼而穎悟。未就師傅。已略能誦詩。既長。受業於文懿許公。不出戶者十有餘年。而所造極深。六經百家之說。無不究之。雖名物度數之微。亦皆訂駁其同異。大抵其學以濂洛諸儒爲宗。故粹然一出於正。武威余公持節海右。深慕思誠之學。特傾下之。余公善大篆。或請書揚雄九州箴者。余公不知所出。思誠曰。此載在古文苑。卽援筆寫之。後覆以其書。不差一辭。余公爲之驚服。思誠天性孝友。處已接物。簡易平直。無矯情之行。自幼至老。劬書不厭。善字學。得虞伯施之法。嘗手錄諸家異書。亡慮數百卷。又凡所讀之書。輒撮其諸凡。而附之以論辨。名曰破萬總錄。錄一千卷外。有六經問對若干卷。鉤玄集若干卷。書學指南若干卷。存齋雜稿若干卷。皆藏於家。思誠諱懷德。思誠其字也。姓唐氏。唐爲金華著姓。宋南渡後。擢進士第者十有七人。其與鄉貢舍選及曹試童子科者。莫可勝數。而傑然出乎其間者。世稱說齋先生。先生諱仲友。天分絕人。書經目輒成誦。遂以學行名天下。由紹興甲戌進士。中博學宏辭科。召試館職。累遷著作郎。迭守名藩。更秉使節。終官朝議大夫。思誠先生七世從孫也。人竊意思誠問學之富。似無忝於先生。

君子之澤其未艾也。當於思誠乎徵之。孰知一文學掾之祿。有不能食。況望如先生。烜著於時乎。此濂反覆嗟悼而不能自己者也。雖然。先生之名。其垂之於今者。以學不以位也。位勢之隆。可行志於一時。學術之殷。則遺芳於千載。今思誠雖死於困窮。而其所著書具存。其不與形俱亡者。固自若也。惡知後之人不以稱先生者稱思誠乎。濂又何悼焉。姑歷序相知之次第。以告世之知思誠者。思誠曾祖欽。祖津。父琰。孫皆不與仕籍。卒年五十有一。娶金氏。五丈夫子。升。賁。晉。恆。震。女二。申。戌。汪。道演。其壻也。孫男三。道堅。無逸。梓材。墓在縣北婺女鄉之陽岡。以其年十月某日葬。銘曰。孰爲曉曉而不昭昭。孰爲訛訛乃復焯焯。二氣糾紛。莫知其門。有遺者文。瘁乎霞氛。匍乎霆奔。不泐以堙。不軌以髡。後千百齡其永存。

徐夫人墓銘

婦德以柔順爲美。然以之處常可也。苟無堅疑之質。事變臨之。其能自立者鮮矣。故持之以堅貞。行之以柔順。斯足以爲賢婦。偏一則有虐忘縱佚之失焉。若徐夫人者。其備婦德者乎。夫人姓余氏。衢之開化人。年二十。適邑士徐君安。越十三年。生四子。徐君死。舅姑皆老。家莫爲主。貨產頗傾蝕。夫人日奉羞膳。升堂問體安否。退則率媵妾治絲纈麻枲。歲時機杼之聲。聞於鄰里。衣服諸子。務臻華好。青裳綵衿。少長巋然。使人不知其爲孤。年七八歲。委之於學。慈嚴兩至。責其成績。由是諸子咸爲善士。而家迄以成。舅姑相繼壽終。治喪葬以禮。鄉人暴強者皆畏其能。莫敢凌犯。教女語婦。必以夫人爲則。年七十有八。以洪武九年

九月七日卒於家。二十三日葬於清源里西村之原。三男曰祿、可、說。一女適某。孫男五人：玄、生、林、璣、桂。生以國子生擢給事中。來請銘。銘曰：

柔順爲德。斯婦常濟之堅。貞家乃昌。執偏或墮。弱與強二者維全。保無爽。猶徐夫人婦之良。喪夫秉志。事尊章。內外屹然。禮義防躬。親織紉靡怠。荒家政。浸修貨大穰。男治書詩。女衣裳。壽彌德備。名譽彰。孝孫列銘闡幽光。卓哉婦則垂無疆。

故朱夫人戚氏墓銘

夫人姓戚氏。諱某。字某。婺金華人。宋朝奉郎知袁州事如琬之曾孫。從政郎廣德軍司法參軍宋祥之孫。貞孝先生紹之女。年若干。歸義烏朱君元。踰若干年喪其夫。三子皆幼。時宋亡爲元。盜起旁縣。焚廬舍。剽劫家。單甚。夫人艱勤悲悴。事舅姑無怠容。遇諸子有恩而嚴。少子嘗戲取人一鷄卵。夫人怒曰：是乃所當取耶？笞而責還之。稍長。遣從許文懿公遊。督教愈於夫在時。粥斂釧資之。俾無勸懈。父老病殊殆。迎以就養。烹藥進食。不寐者三月。卅十年乃終。不以喪葬累兄弟。出私貲爲具。女兄歸宋氏。蚤死。夫人育其三孤。兒長。兒亡。又撫循其男女。爲擇名族嫁娶。族女貧不能行者。必以貨助。窶家得子多溺死。以倫理訓誘。俾勿溺。資以粟帛。里中人德夫人如慈母。夫人與娣姒和。視娣姒子猶己子。御媵婢仁而威。聞夫人警。效咸肅畏。譁者止。惰者執業以俟。久而知其可事。多終身不忍去。夫人春秋既高。三子冠裳翼然。須髮頽白。升堂奉觴。以次爲壽。諸婦孫男女數十人。列侍左右。歡愉竟日。年八十時。媼連賓客慶問者以千計。夫人讀

書史爲人言。皆有詞采可稱述。壽八十有七。猶康彊不衰。且起盥櫛。召子孫來前曰。吾殆死矣。就枕熟寐。日晡遂卒。至正丙戌五月九日也。十二月某日。遷朱君之柩。合葬某里東山之原。三子長曰震亨。有學行人尊之曰丹溪先生。次曰巽亨。次曰蒙正。皆善士。孫男五人。嗣衍。嗣洪。嗣紀。嗣湜。玉汝。孫女十人。皆爲巨室妻。曾孫男二人。文柏。文楮。女子三。一適人。其二在室。夫人卒三十五年。嗣紀以狀拜泣曰。夫人於朱氏爲賢母。宜得銘。余曰。嘗聞丹溪言。信然。丹溪學可師法。觀丹溪可知夫人賢。觀夫人。其子之賢益可徵。余奚由讓。銘曰。

詩稱賢知。多本母氏。史傳子輿。三遷是紀。仁猷義訓。與性皆成。導之爲善。川赴木升。少闕其端。愈長滋戾。曷若夙教。圖難於易。有儒丹溪。行介德方。匪惟師承。惟母之良。祇率慈惠。具有典則。尊章歎咨。遐邇遵式。黃髮朱顏。眉壽樂康。環珮紳綵。秩其盈堂。善慶孔多。澤則在後。後人勿忘。碩儒之母。

故王母何夫人墓銘

門人王綬喪其母夫人何氏。衰衣稽顙。求造墓隧之文。予與綬之父翰林待制君。學爲同師。官爲同朝。揆義不可辭。夫人諱妙音。婺之義烏人。大父仁。父智。母傅氏。父早世。傳厄於窮。重醮金華俞氏。俞故名閎。夫人隨母鞠其家。逮長。大父器之。撫其頂曰。是女柔嘉。其凡子儻耶。時同里初齋王府君良玉。家居講授。受業者百人。大父爲夫人擇配。環視諸弟子。心自計曰。無有出王禕右者。禕即待制君。府君之仲子也。府君揣其意。乃命行媒相知。名片言成姻。夫人旣歸。事君舅君姑甚恭。待娣姒壹以和勝。三族競誦其賢。待制

君方從黃文獻公學。絕不爲家謀。夫人挺身任之。不以一髮貽其憂。待制君能以文辭鳴海內者。夫人之助爲多。待制君出佐方州。入官禁林。恆挾少房與俱。夫人安之。謂世之當然。自後待制君持節諭西南夷。六載不返。夫人攻苦食淡。煢煢然與二子綬。紳居。歲時具牢醴祭王氏祖。若禰。奉卮酒前酌。命二子拜後。曰。我王氏老主婦也。禮則宜然。聞者爲悲之。夫人訓二子成人。且爲授室。抱二女孫宜。定宜亦許適子孫。恂。夫人猶日治絲枲。不廢經畫。內政斬斬中度。雖偉丈夫有所不能。由是家浸裕。然以待制君久未還。積憂成疾。羣醫不可藥。紳畫焉心傷。亟剖股作糜以進。竟不愈。洪武十年二月十一日遂歿。壽五十六。其年十一月二十八日。葬於縣南崇德鄉青巖里之象鼻岡。禮也。嗚呼。若夫人者。其盡爲人婦爲人母之道者乎。銘曰。

夫學方弘。婦德維貞。同聲而相應也。雞號而興。絲枲作朋。克勤於內政也。青燈宵明。顧影惻惻。能安於義命也。國史著銘。焯行幽局。欲其辭之稱也。

故金母翟氏夫人墓銘

洪武乙卯七月三日。故金母翟氏夫人以疾卒於南京之寓舍。壽七十六。卜以其月二十四日。奉柩還葬。故居無爲州巢縣之囊臯鎮。其子朝興。旣備書卒葬歲月。刻石以寘玄堂。復介予友錢顯狀其羣行。請立銘於墓門。按狀夫人世居無爲州城偃月池上。今遷於囊臯。父大成。巢縣稅務副使。母徐氏夫人。自幼溫醇莊重。巍然如成人。父母有命。毫髮不敢違。事姊若兄。亦盡其愛敬之道。故一家奇之。皆言慎擇所居。不

可與凡子年十六始歸同縣金君斗輔今封鎮國將軍僉大都督府事夫人既歸孝養舅姑甚至婉愉其容色唯恐有拂其意晝食之間未饋食不敢先飯或遇有疾具鼎烹藥齊嘗而後獻其於四時祭祀之禮尤謹祭器必親滌濯瀕祭心存目著儼乎若有覩者助鎮國公以節儉植家凡爲伉儷者六十年相敬如一日未嘗以片言相加遣人以爲難遇諸內外嫗族一循禮節若鄰曲若僚媵亦皆有恩惠故稱夫人之德者無間言生子男四人長溫次良次恭皆先卒季卽朝興驍勇而有謀當元季兵亂四海鼎沸歲乙未從皇上渡江與諸將削平江東取淮瀾下湖湘定中原收西蜀十五年間與有勞烈遂由同知振武衛親軍指揮使司事陞爲本衛指揮使階昭勇大將軍改鎮國將軍僉大都督府事於是司勳援例上聞夫人致有今封鸞誥賁臨人皆爲夫人榮不幸以一疾終嗚呼夫人其飭躬也儉其奉上也孝其事夫也敬其迪子也嚴其使下也惠五者備矣其無愧婦道母儀者乎銘曰

葆貞則兮循天經叶篤孝敬兮奉尊章親滌濯兮慎烝嘗事夫以敬兮終身不爽叶子爲武臣兮從征四方斬將奪旗兮紀功太常鸞誥自天兮奕其寵光夫人雖歿兮令名不亡藁臯之原兮山秀水明叶太史作銘兮薦此石章

故寧海郭君妻黃氏墓銘

天地之間爲人倫之綱者有三曰君也父也夫也君統臣父統子爲綱固宜妻與夫齊亦以繫之者何蓋夫者婦之天婦能尊夫夫能統妻則倫紀修明而家政嚴飭不然則反目之禍作而數諸之事起矣其有

生能敬夫如賓。歿而服喪若父者。孰不謂之賢哉。予於寧海黃夫人之事。不能無所感也。夫人諱珍。生有淑質。父某與其母王氏絕愛之。年十八。歸同里郭君仁壽。夫人尊之甚異。動靜必遵稟而行。毫末不敢欺。內外諸政。率皆親蒞。雖甚勞動。弗憚。君好賓客。朝夕酣觴淋漓。談辨以爲適。家單不能備物。夫人極意營集。不使知窘澁之狀。君一日入台城。歿於旅邸。夫人聞之。慟絕者數四。及靈車至庭。撫棺一號。遂暈眩仆地。幾欲無生。以湯藥灌之。移刻乃蘇。治喪一循古禮。布苫柩側。取石爲枕。不解衣而臥者三月。石有稜。當枕處肌肉成創。創液浸淫。其子泣爭欲以木易之。不許。三年。弗御酒肉。柴毀骨立。與人言。則曰未亡人未亡人。未嘗有愉色。或曰孝子之喪父。其有過於夫人者乎。或曰夫人之事夫固至矣。其於君舅君姑。殆有過無弗及焉。事舅姑固孝矣。其在家也。善奉父母。亦有過無弗及焉。其後父母無子而終。相夫卜宅兆瘞之。哀慕至老不衰。若夫人者。豈古之所謂無愧人道者非邪。嗚呼。位極三旌。有不足榮也。祿盈萬鍾。有不足貴也。名傳四裔。有不足多也。此權勢者可僥倖而致也。惟夫制行可以厚人倫。可以移風俗。古今人莫不多之。貴之榮之。亘天地始終而不可泯也。其不可泯者。非有增三綱九法之重者乎。夫人之事。烏可使之不傳乎。夫人壽五十六。卒於洪武己未正月二十三日。以其年某月日葬於某山。生子四。彌遠。濬。俊。女一。適博士常孫三女二。予在京師。濬爲太學生。嘗從予遊。以文學知名於時。濬來請銘。銘曰。

振其綱。萬目乃張。卑尊而有常。庶各循乎降衷。^叶苟反於斯。維家之殃。懿哉夫人。厥德允臧。可以重彝倫。而樹世防。彤筆煒煌。特以昭其藏。

陶先生妻喻氏墓銘

嗚呼。是惟當塗陶夫人之墓。夫人。馴德淑行。自幼出天性。父母異之曰。是女也。良非凡子配也。慎選久之。始嬪同郡陶先生安。姑徐氏方毅。以禮束羣下。不可越尺寸。雞始鳴。夫人往候起居。察顏色。薦羞。能獲姑心。姑病。皇皇不自寧。力苟可致。無弗及者。暨卒。先生適。以使事留淮。夫人襲斂殯奠。無遠度。晝夜慟。幾至傷生。人稱爲孝婦。先生沈涵道藝。以千載自期。夫人恐以家汨其志。凡內外政。皆身服之。不以勤先生。先生之名聞於江南者。夫人有助焉。先生舉進士。州人士無少長咸賀。夫人不喜色。或怪之。夫人曰。夫君所滋者德爾。名非所急也。及爲校官。問道考德者。接武而至。夫人則館之。如未嘗貧。春秋之祀。盛服事滌濯。不役媵御。及祭。升降周還。精誠迫至。若欲見之。恆居不施丹鉛。不服金鈿翡翠綺繡物。後其家雖盛。夫人處之猶前貧時。女弟四。皆適閭右族。歲時來歸。各爲靡曼飾。相夸漫。夫人唯御常服。充充無歡容。喻宗諱曰。是祇專靜嘉者也。諸婦今得師矣。人稱爲令妻。訓二子動靜必以學。稍涉豫怠。正色訶勵之。偶見奕器於甌。怒曰。此牧豬奴戲耳。汝爲名家子。亦復爾耶。畀之火。二子因惴慄自持。遂以學聞。人稱爲淑母。先生將移家秣陵。夫人不忍獨其母。且虞有兵禍。力迎與俱。母以耄年辭。夫人泣曰。世道方棘。唯高城深池可倚耳。母從之。其族果及於難。人又服其有先識云。夫人諱德常。字可貞。姓喻氏。喻爲當塗名門。曾祖某。祖某。父汝政。母梅氏。二子則晟。昱也。孫一。壻。壽四十七。以某年月日卒。卒後十日。權厝江寧縣陶家山之原。嗚呼。自先王之教不行。公卿大夫多涼德。以名勢相銜。以利祿相媒。頽波滔滔。日流而弗返。況所謂女婦。

乎。有如夫人羣行之美。可爲女師。可爲女範。蓋於古而無愧者。又何可少也。昔劉向傳列女八篇。一事之善。唯恐泯沒無傳。使夫人生於其時。名有不著者邪。銘曰。

夫人之行柔且則。饋祀潔齊。家政飭補。紉澣濯亦盡職。紛華弗御。食儉德內外順。治夷以懌。栗而能剛。類圭璧。羣女從之視爲式。壽年不遐。聞者惻。先生祿位日赫。旒玳首錦囊。書五色。龍光當臨。賁幽室。史氏作銘。示罔極。

